

PRATHAMA SARGGAH
HARAN LAN WAWIDANGAN DÉSA

Pawos 1

- (1) Désa puniki mawāṣṭa Désa Pakraman Teméga; salantur ipun kinucap kalih kasurātang sajroning lěkita, "Désa Pakraman Teméga".
- (2) Désa Pakraman Teméga, magenah sajroning wawidangan Désa Pakraman Ababi.
- (3) Sajěroning Désa Pakraman Teméga, wéntěn babañjaran lwiré:
 - ha. Bañjar Budamanis;
 - na. Bañjar Gedé;
 - ca. Bañjar Penataran Alit;
 - ra. Bañjar Triwangsa.

DWITYA SARGGAH
PIKUKUH LAN PATITIS TATUJON

Pawos 2

Maka pikukuh, Désa Pakraman Teméga, ngarajěgang, mikukuhin, kalih mitindihin pisan :

1. Pancasila;
2. Undang-Undang Dasar 1945;
3. Tri Hita Karaṇa.

Pawos 3

Désa Pakraman Teméga ngamanggéhang patitis tatujon, lwiripun :

1. Ngutamayang tata-cara maagama Hindu.
2. Ngawangunang katréptyan sajroning désa pakraman, mangda kasiddhan rajég katréptyaning praja.
3. Ngawrèddhiang kawicakṣaṇan minakadi kaprajñanan, maka larapan gumawé gémuh landuhing praja.
4. Ngawrèddhyang padréwyaning désa, majalaran kawicakṣaṇan guṇa lakṣaṇa mānūt dharmma-prawrètti.
5. Ngarajégang Dharmma-āgama miwah Dharmma-nāgara.

TRITYAS SARGGAH

SUKERTA TATA PAKRAMAN

Palèt 1

Indik Krama

Pawos 4

(1) Sané kabawos krama Désa Pakraman Teméga, lwiré:

- ha. Sang sapisira ugi jènèk magènah ring wawèngkon Désa Pakraman Teméga, lintang ring tigang śāsīh, saha sampun mipil ring sinalih tunggil Bañjar Pakraman sané wènten ring Désa Pakraman Teméga;
- na. Sang sapisira ugi wéd saking Désa Pakraman Teméga, jènèk magènah ring dūra désa liwaring Désa Pakraman Teméga, nānghing kantun mipil ring salah sinunggil bañjar sané wèntèn sajroning Désa Pakraman Teméga.

(2) Papalihan krama désa, kadi hinucap ring sor puniki :

- ha. Krama Ngarëp Ayah Bulangkëp, krama désa sané bulangkëp, sané sampun mipil ring bañjar sinalih tunggal sané wéntën sajroning wawëngkon Désa Teméga, maayahan bulangkëp, matata turun cumëk;
- na. Krama Ngarëp Ayah Asélé, krama désa sané bulangkëp, sané sampun mipil ring sinalih tunggal bañjar sané wéntën ring wawëngkon Désa Pakraman Teméga, maayahan asélé manut kawongannya, matata turun cumëk ring désa.
- ca. Krama Unggu, inggih punika truna tua, dëha tua sané ngamong karang;
- ra Krama Ñada, krama désa sané sampun tan këni paayah-ayah lwiré:
 - 1. Saking pinunas ngaraga tur sampun polih lugraha manut panglokikan prajuru désa, kalih pamutus pararëm désa;
 - 2. Mabukti sungkan rahat tur suwé, kantos tibanan, sungkan tan siddha waras, tan siddha maayahan manut panglokikan prajuru désa;
 - 3. Sampun mayusa 70 wara manut panglokikan prajuru désa.
- ka. Krama Balu, krama désa lanang wyadin istri, sané katinggal séda antuk rabiné, krama lanang sané kakawonin nyapian antuk rabinnya, wéntën balu camput, wéntën balu masëntana;
- da. Krama Ngalaga, sang sapa sira hugi wëd saking Désa Teméga sampun bulangkëp, jënëk magënah ring dūra désa liwaring Désa Teméga, nanging manggëh mipil ring bañjarnia nguni;

- ta. Krama Tamyu, inggih punika krama sané kinucap ring sor puniki:
1. Sang sapisira hugi saking dūra désa liwaring Désa Teméga jěněk magěnah, madadunung ring pomahaning krama désa, magěnah ring pomahan druwen Guru Wisésa, Hotél, miwah salwir ipun, sasampun tigang sasih utawi 105 dina, nangingh kari manggěh makrama désa ring kamulan désannya, kabuktyang antuk surat sasinahan saking kělyang désannya.
 2. Sang sapisira hugi wěd saking liwaring Désa Pakraman Teméga, makakubon ngěnahin palěmahan: tēgal, palasan ring wawěngkon Désa Pakraman Teméga, nangingh kari manggěh makrama désa ring kamulan désannya, kabuktyang antuk surat sasinahan saking kělyang désannya.
 3. Sang sapisira hugi jěněk magěnah ring wawěngkon Désa Pakraman Teméga, yan tan maagama Hindu, kasinanggěh tamyu, tan sarěng sapolikramaning agama Hindu ring Désa Pakraman Teméga.
- sa. Tamyu Ngajag inggih punika, sang sapisira hugi rawuh ka jroning Désa Pakraman Teméga, nangingh tan někěh magěnah irika, sang karawuhin antuk tamyu punika patut matur supékša ring prajuru désa, kalih ring sang amawa rāt, sajroning arahina ring awěngi, yan tan asapunika, prajuru désa wěnanng maritětēs yan macihna mamurug awig-awig paswara miwah pamutus pararēm désa, sang něrima tamyu kěni danda manut paswara, tamyu kinucap katur ring sang amawa rāt.

Ngawit tédun makrama désa ring Désa Pakraman Teméga :

1. Krama Ngarěp Ayah Bulangkěp malarapan antuk tatěragan bañjar, lwiré:
sampun bulangkěp, sasuwén ipun pasasur dina saking dina rangkaté,
mipilang raga ring sinalih tunggil bañjar sané wéntěn sajroning Désa
Pakraman Teméga.
2. Sang sapasira hugi wěd saking dūra désa, jěněk magěnah ring
wawěngkon Désa Pakraman Teméga, sasampun tigang śasih utawi 105
dina, katěrag antuk prajuru bañjar sané ngawawa pagěnahannia.
3. Krama désa wěd saking Désa Teméga, matinggal ka dūra désa, wastu
malih mawali ka Désa Teméga :
 - ha. Yan sangkaning rahayu, kalih saking palugrahan prajuru désa
patinggalé nguni wěnanng mawali mipil ring sinalih tunggil bañjar
sané wéntěn sajroning Désa Teméga, nganutin paswara utawi
pararěm désa, raris mabañjar nganutin pituduh prajuru désa;
 - na. Yan sangkaning tan rahayu patinggalé ngūni, yogya kělyang bañjar
sané katuju ngatěngahang babawosé ka désa, mangda kabawosin
antuk prajuru désa, yan katinutin tatěpasan prajuru désa punika,
manut pararěm désa, tur kacihnayang antuk maguru piduka ring
sinalih tunggil Pura Kahyangan Tiga Désa Teméga, prasiddha
kalugra mipil pinaka krama Désa Teméga, nganutin pituduh prajuru
désa.
5. Sang sapasira hugi sampun mipil ring sinalih tunggil bañjar sané wéntěn

ring sajroning Désa Teméga, tan dados magingsir mabañjar ka bañjar sawosan, sané wénten ring Désa Pakraman Teméga.

Pawos 6

Husan makrama désa ring Désa Teméga, malarapan antuk :

1. Séda;
2. Sangkaning pinunas ngaraga, sasāmpun polih palugrahan prajuru désa ring paruman désa;
3. Tédah utawi tilar saking Agama Hindu;
4. Kasěpékang saha kahěladang antuk Désa.

Pawos 7

1. *Swadharmaning krama désa :*

ha. Krama Ngarěp Ayah Bulangkěp, yogya kěni pāyah-ayahan bulangkěp, matatā-turun cuměk, ñanggra sarāja kāryyan désa, *mānut hunggwan sowang-sowang;*

na. Krama Unggu, sané ngamong karang, yogia keni paayah-ayahan aselé manut kawonganya miwah tata turun satengah tata turun sang *bulangkěp;*

ca. Krama Nada, dados kaarahin pacang tédun ka désa yan bwat pacang mapapinėh, mababawos, ngawangunang pangrěncana salwiré, sané *kabwatang antuk prajuru désa;*

ra. Krama Balu Lanang wyadin istri kěni paayah-ayah asélé, manut

kawongannya, matata turun asigar.

- ka. Krama Ngalaga, yogya ngaturang panahub pangélagaan, ngamasa-
inasa ngaśasihang Tilēm Kasanga ring bañjar sowang-sowang gung
artha manut pararēm désa, matata turun cumĕk, ñanggra saraja
karyyan désa;
- da. Krama Tamyu sané maagama Hindu, yogya ngaturang panahub ka
désa, ngamaśa-maśa ngaśasihang Tilēm Kasanga ring bañjar
sowang-sowang gung artha manut pararēm désa, minakadi
ngaturang dana pawangunan ritatkālaning désa mapawangun,
ngayum wawangunan sané kadruwé antuk désa, gung artha, manut
sakasiddhan;
- ta. Tamyu sané tan maagama Hindu yogya ngaturang jinah sasabwan
manut pararēm désa, ngamaśa-maśa satunggil kawéntĕnang
pacarwan jagat nunggil śasih Kasanga;
- sa. Krama désa miwah kulawargan krama désa samian yogya saturut
ring daging awig-awig Désa Teméga, paswaran miwah pararēm
désa, ngutsahayang mangda kasiddhan mapikoliĥ sakadi patitis
tatuĥon désané kinucap ring hayun, tumus mamangguhang
kajagaddhitaning praja;
- wa. Sang sapisira hugi sané pacang ngadol, ngantahang, masĕlangang,
majĕgang, masĕwayang, makĕdihang palĕmahan tĕgal, palasan,
miwah sané sawosan sané magĕnah sajroning wawidangan Désa
Teméga, hugi mangda polih palugrahan saking prajuru Désa
Teméga, yan tan polih palugrahan yogya indiké punika
kahandĕgang;
- la. Yan wéntĕn sinalih tunggal sang sapisira hugi jĕnĕk magĕnah ring

wawidangan Désa Teméga, tan makrama désa, tan kalugra ngalakṣaṇayang upacāra pañca yajña, ring wawidangan Désa Teméga, tan kalugra nganggén salwiring druwén Désa Pakraman Teméga.

2. Tamyu sané néntèn maagama Hindu swadharman ipun kaungguhang sajeroning paswaran désa, pamutus pararēm Désa Teméga.
3. Phalapékṣa ning krama désa, lwiré :
 - ha. Krama désa samyan yoga polih pasayuban wyadin pangōban saking désa, salwiring wyawaharanya yoga kabawosan antuk prajuru désa, manut tata titining wicara;
 - na. Krama désa samyan sané maagama Hindu sajaba tamyu wēnang ngalakṣaṇayang Pañca-yajña sajroning Désa Pakraman Teméga, mānut désa, kāla, patra, śāstra-agama, miwah nganutin sitan Désa Teméga;
 - ca. Krama désa Ngarēp Ayah Bulangkēp, wēnang polih babagyan layuban aci-aci salwir ipun, miwah sawosan sané patut katiba ring krama désa;
 - ra. Nyaluk mapitēgēs kalugra tan tedun maayahan manut panglokikan prajuru désa;
 - ka. Sané dados ñēlēdihi minakadi nyuksukin ayahan sang tan tēdun maayahan yan sāmpun mayuṣa 15 warṣa, sāmpun manggēh masēkēha truṇa ring sinalih tunggil bañjar sané wéntèn sajroning Désa Teméga, manut panglokikan prajuru désa.
4. Mungguing phala pékṣa krama tamyu sané néntèn maagama Hindu kaungguhang sajroning paswaran désa.

Palét 2

Indik Prajuru Désa, Sabha Désa miwah Kértha Désa

Pawos 8

1. Désa Pakraman Teméga kahémong antuk prajuru désa.
2. Prajuru Désa Pakraman Teméga, lwiré:
 - ha. Bëndésa/Keliang Désa;
 - na. Pamadén Bëndésa/Keliang Désa;
 - ca. Pañarikan adiri;
 - ra. Juru Rakşa adiri;
 - ka. Patangan adiri;

Pawos 9

1. Sané wénang kahadégang wyadin kamanggéhang dados prajuru désa;
lwiré:
 - ha. Krama Wéd Ngarép Ayah Bulangkép, sané jěněk magėnah,
makrama désa, matata turun cumėk, maayahan saurah-arih ring
Désa Teméga.
 - na. Tan cédāngga; sakadi pécėng, pérot, cungh lan sapanunggilan
ipun;
 - ca. Wikan mamawos kalih ģurat akşara Bali utawi Latin;
 - ra. Mayuşa sa sor ipun 35 warşa ngantos sadurung ģada ring bañjar;
 - ka. Mabukti tan nahėn malakşana corah.
2. Kértha Désa Pakraman Teméga sakadi ring sor puniki:
 - ha. Nahėn dados Bëndésa utawi Pangrajėg ring Désa Pakraman
Tėméga;

3. Pidabdab ngadëgang prajuru désa lwiré:
 - ha. Prajuru désa patut ngadëgang pangorëg sané yogya midabdabin ngalakṣaṇayang indik ngadëgang prajuru désa;
 - na. Sowang-sowang bañjar pakraman wë nang nyudi krama désa wëd ngarëp bulangkëp pinaka babakalan uthawi calon prajuru désa;
 - ca. Krama sané kasudi pinaka babakalan utawi calon prajuru désa tan dado kaadëgang dados pangorëg pamilihan;
 - ra. Sané patut tédun pacang mamilih lwiré: krama désa ngarëp ayah bulangkëp miwah krama ngalaga;
 - ka. Babakalan prajuru sané kapilih antuk krama sarëng akéhan punika kaadëgang dados bëndésa;
 - da. Mungguing ngadëgang panyarikan, pangliman désa, minakadi saya pangëlingsir saking pañudin Bëndésa.
4. Laminé madëg dados prajuru désa wantah limang warṣa, ngawit saking dina pawintënané sajaba kapadgatakālan.
5. Yan sang sampun nahën madëg pinaka prajuru désa dados kasudi malih kahadëgang maka Prajuru Désa.
6. Prajuru désa patut mawintën majaya-jaya ring Pura Pasar Agung, mungguing déwaśa manut pamutus paruman désa rikāla ngadëgang prajuru désa hinucap.

Pawos 10

Swadharmaning Prajuru Désa lwiré :

1. Midabdabin désa, krama désa, pacang ngupadi kajagaddhitan sakala

- nişkala, maka darśana awig-awig désa, paswaran désa, pamutus pararēm désa, nganutin śāstrā Agama Hindu minakadi ugēr-ugēr nāgara.
2. Ngarañcana salwiring utsahan désa, ngarañcana salwiring sané ñandang pacang wangunang, sané patut liayum, manut lokika désa kāla patra, sané mabwat mangda kasiddhan polih palugrahan guru wiśéśa.
 3. Mawosin salwiring wyawahara utawi wicara sané wētū sajroning Désa Pakraman Teméga, niwakang tatimbang utawi pamutus babawos sané yogya kaputusing sajroning désa pakraman. Yan tan kasiddhan kabawosan ring désa, prajuru désa mituduhang ngaturang ring Guru Wiśéśa mangda kabawosan.
 4. Mratyakṣa, nulingayang saparipolah kēlyang-kēlyang bañjar, pēmangku désa, kēlyang pacalang, kēlyang sēkēha-sēkēha sané wéntēn sajroning wawēngkon Désa Teméga.
 5. Midabdabin salwiring pamarggin haci-aci ring Désa Pakraman Teméga, talēr nulingayang krama désa indiké ngalakṣaṇayang Pañca-yajña.
 6. Ñanggra salwiring pituduh, minakadi sarāja kāryya saking guru wiśéśa, wērat utawi ringan, sané yogya katiwak ring désa pakraman.
 7. Pinaka dutta pacang matēmuang babawos ring sang sapisira hugi, yan paindikan punika kapinēh ñandang pacang marginin.
 8. Pinaka śakṣi rikāla wéntēn krama désa ngawéntēnang widhi widāna pawiwāhan, minakadi mēras sēntana miwah saraja karya sané mabuat.
 9. Wēnang ngawangunang langlang utawi pacalang désa sané patut ngalanglangin saraja karyyan désa, nulinga katrēptyan sawawēngkon Désa Teméga, salantur ipun indik ngadēgang, swadharmma minakadi phala pékṣa langlang wyadin pacalang manut pamutus pararēm désa minakadi paswaran désa.
 10. Wēnang ngawangunang sēkēha-sēkēha sawosan, sané pacang ngarombo swadharmman prajuru désa.

Pawos 11

Swadharmaning Sabha Désa, miwah Kërtha Désa, lwiré:

1. Kërta désa patut saréng mikayunin kalih mawosin, sajéroning midabdabin désa, mangda kasiddhan ngulati kajagaddhitaning praja.
2. Kërtha désa yogya maritëtës minakadi ngicénin tatimbang salwiring wyawahara sané mētu sajroning désa pakraman, sané katunasang antuk prajuru désa kapikukuhang sajroning Paruman Désa.

Pawos 12

Phalapékšaning Prajuru Désa:

1. Luput papëson ritatkāla aci piodalan ring Pura Kahyangan Désa minakadi kahyangan ėmponan désa manut pararĕm désa Pakraman Tĕméga.
2. Polih pawĕwĕh ritatkāla krama désa molahan rikāla Pacaruan Désa Pakraman Tĕméga.

Pawos 13

Pamidandha prajuru désa:

1. Yan wéntĕn sinalih tunggal prajuru iwang śāsanya miwah ngaliñokang sahanan druwĕn désa, tur prasiddha kabuktyang kaiwanganya antuk krama désa, punapi malih bangĕt piwal ring daging awig-awig, paswara miwah pararĕm désa, patut kĕni pamidandha (manut daging pararĕm désa).
2. Patut ngawalyang sahananing druwĕn désa sané kaliñokang, saha kararyanang dados prajuru désa.

3. Prajuru désa sané kararyanang majalaran wyawahara tan dados kahadégang malih dados prajuru désa, lan kërta Désa.

Pawos 14

Prajuru désa kagëntosin utawi husan, majalaran antuk :

1. Séda.
2. Tan siddha ngamargyang swadharmanya, sajroning nēm sasih saking tan nēdunin sangkēpan.
3. Mapinunas sangkaning rahayu, sasāmpun polih lugraha saking paruman désa.
4. Majalaran tutug sengkēr pangadégé.
5. Sangkaning kararyanang antuk Paruman Désa, duaning mabukti iwang.

Palèt 3

Indik Kulkul

Pawos 15

1. Sajroning wawēngkon Désa Pakraman Teméga, wéntēn babacakan kulkul, kadi ring sor puniki :

ha. Kulkul-kulkul pura;

na. Kulkul désa;

ca. Kulkul bañjar;

ra. Kulkul sēkēha-sēkēha.
2. Mungguing swaran kulkul punika mangda mabhina-bhinayan sawiji

sowang, manut sor singgih, yan wéntën swaran kulkul patëh, karun wyadin sawër, mangda kapaštika salah sawiji, antuk sang madruwé.

3. Nēpëk kulkul manut Tri Brata Sandhi: dharmma, śima, lakṣaṇa, tēgēsipun:

ha. Dharmma: swaran kulkul makacihna wyadin tatēngër upacara agama wyadin yajña.

na. Śima: swaran kulkul makacihna wyadin tatēngër pañca bhaya.

ca. Lakṣaṇa: swaran kulkul makacihna wyadin tatēngër patēdhunan.

- 4) Indik tatēpëkan kulkul manut pasobhaya, kuna drēṣṭa, minakadi paswaran désa.

- 5) Hunggwan nēpëk kulkul :

ha. Yan nēpëk kulkul tatēngër patēdhunan, hugi kulkul sané kadruwé antuk krama, sané pacang tēdhun, katēpëk antuk sang patut ngulkulang.

na. Yan nēpëk kulkul tatēngër pañca bhaya, wēnang sahunggwan-hunggwan, asing nampëk gēnahé, wēnang katēpëk antuk sang rihinan manggihin bhaya punika, minakadi sangkaning patuduh sang ngawiwēnangang.

ca. Yan nēpëk kulkul tatēngër upacara agama, déwa yajña, bhuta yajña, mānuṣa yajña, pitra yajña, wēnang kulkul sané wéntën ring sowang-sowang gēnah upacarané.

ra. Yan kālaning ngalungayang bhaṭāra, mēndak bhaṭāra, Bhaṭāra turun kabéh utawi makihis, kālaning pacaruwan désa, sami kulkulé sajëroning désa dados kaswarayang, tatēpëkan manut krama. Yan

wéntën sinalih tunggal mamurug nĕpĕk kulkul tan manut krama
yogya kabawosan antuk prajuru désa katiwakan panglokika saha
pamidandha manut paswaran désa.

Palĕt 4

Indik Sangkĕpan, Paruman miwah Pasamuhan

Pawos 16

Mungguing sangkĕpan, paruman minakadi pasamuhan sajroning Désa
Pakraman Teméga kadi ring sor puniki :

1. Sangkĕpan prajuru kawéntĕnang ngaśasih nuju rahina Anggara Kliwon.
2. Paruman pĕmangku, padgatakāla manut sakabwatan.
3. Pasamuhan Désa, kawéntĕnang ngĕnĕm śasih nuju ring rahina Radité
Pahing Sinta.
4. Sangkĕpan bañjar, minakadi sangkĕpan sĕkĕha-sĕkĕha sané wéntën
sajĕroning désa Teméga kawéntĕnang manut awig-awig paswarannyané
sowang-sowang nanghing hugi tan sinarĕngan ring sangkĕpan prajuru,
paruman miwah pasamuhan désa Tĕméga.
5. Sangkĕpan prajuru désa, miwah pasamuhan désa dados kalakṣaṇayang
padgatakāla manut kabwatan désa.

Pawos 17

1. Sané patut nĕdunin sangkĕpan prajuru désa punika lwiré prajuru samyan,
kĕlyang-kĕlyang bañjar, pĕmangku-pĕmangku désa, kĕlyang pacalang,

kélyang sèkèha-sèkèha sané wéntèn sajéroning Désa Teméga sané kabwatang antuk désa.

2. Sané patut nédunin pasamuhan désa punika lwiré: prajuru désa, kerta désa, krama désa ayah bulangkép, krama désa ngalaga.
3. Maka manggalaning mababawosan sajroning sangkěpan, paruman, minakadi pasamuhan désa, manggěh panglingsir utawi bėndésa, wyadin salah sanunggal prajuru sowang-sowang manut pituduh panglingsirnya.

Pawos 18

Tata kramaning sangkěpan, paruman miwah pasamuhan:

1. Nganutin arah-arrah, malarapan antuk swaran kulkul désa.
2. Sang pacang ngamilėtin patut mabhusana adat madhya.
3. *Tan kadadosang makta gagaman, pakāryyan saking jěro sané ngawinang sangkěpan, paruman minakadi pasamuhan tan tulus pamarggin ipun.*
4. Tan kalugra ngamėdalang suksukan.
5. *Saya patut makta pasayaan, tęgěp étėh-étėh pasayaan salwir ipun, minakadi haturan canang panaracak, saha pasėgěh, manut drėřta kuna.*
6. Yan kapatut pacang nganggėn babantėn sakabwatan, prajuru désa patut mituduhang mangda cumawis, saha nyuksėrahang padagingan ring sang kapituduh makāryya babantėn ika.
7. Babawosan sajéroning sangkěpan, paruman minakadi pasamuhan hugi ngupadi karahayon jagat, minakadi ngarajėgang kamuruban Sang Hyang Widhi, majalaran bhawa lakřana manut catur drėřta, lwir ipun: désa drėřta, loka drėřta, kuna drėřta, miwah řastra drėřta.
8. Yan wéntèn sinalih tunggai krama ngatėngahang babawos, jroning

- sangképan, paruman minakadi pasamuhan patut kadamyakang, yan ñandang bawosin, yogya rinawosan yan tan ñandang bawosin, antukang ring sang ugamimitin.
9. Sané kinucap pamutus babawos, wyadin paswara jroning sangképan, paruman, minakadi pasamuhan désa yan briyuk sapanggui hanut sang ñangképin, yan tan asapunika, hasing akéhan wénang turut manut panglokika, pamutus babawos patut kalékitayang, kalakṣanayang manut hanggëran ipun.
 10. Pradé tan puput babawosé sajroning sangképan minakadi paparuman désa kantos ping tiga sangképané wyadin parumané, patut katëngahang sajëroning pasamuhan, pamutus babawos sajëroning pasamuhan pinaka pamutus pamëkas.
 11. Pradé wéntën wyawahara utawi wicara mabwat, sangképan, paruman minakadi pasamuhan désa wawu dados kamargyang sasāmpun katëdunin antuk krama désa sakirangnya kalih pahtigayan saking krama désané sami.
 12. Sangképan, paruman minakadi pasamuhan punika kabawos sāmpun puput, yan sāmpun mabacak.
 13. Yan wéntën sinalih tunggal krama néntën nganutin tata krama pasangképan, paruman minakadi pasamuhan kakëninin daṇdha manut pararëm désa.

Palët 5

Indik Druwén Désa

Pawos 19

Sajëroning Désa Pakraman Teméga, wéntën :

1. *Pura Kahyangan sané kaëmpon Désa, lwiré:*

ha. Pura Panti/Tirta Ęmbukan (Tirta Gangga);

- na. Pura Désa;
 - ca. Pura Dalém miwah Prajapati/kadruwé saréng antuk Désa Pakraman Pladung.
2. Pura-pura kahyangan sané tan kahēmpon antuk Désa, duaning sang manruwénang jěněk magěnah ring liwaring Désa Pakraman Těméga, sakadi:
- ha. Pura Pamrajan Pamahyun;
 - na. Pura ...;
 - ca. Pura ...;
 - ra. Pura
- Paikětan pura-pura punika saréng Désa Pakraman Těméga, kaungguhang sajěroning Paswaran Désa Pakraman Těméga.
3. Tirtha Gěnah sané kasucyang, kapingitang antuk désa Pakraman Těméga.
4. Balé désa utawi balé masyarakat miwah tělajakanya.
5. Margi, rurung désa.
6. Tanah pakarangan désa.
7. Sétra Pakraman kadruwé antuk Désa Pakraman Těméga, saréng Désa Pakraman Pladung.
8. Lěmbaga Pěkriditan Désa.
9. Pralinggan Ida Bhaṭāra srěgěp rawuhing ilén-ilén, jěmpana, prabot paayah-ayahan.
10. Sakañcan kělěbutan toya, toya anakan, tihisan sané dados kaanggén pasucian Bhaṭāra, sané dados kaanggén béji, sané dados katantan ka désa pakraman, sami kadruwé antuk Désa Pakraman Teméga.

Pawos 20

Pilih-olih Désa Pakraman Teméga, lwiré:

1. Urunan, panahub, pakénin-kénin pakaryyan krama désa.
2. Aturan, dana punia sangkaning suka nirmala.
3. Pyolih-olih saking Lëmbaga Përkriditan Désa.
4. Pyolih-olih saking usaha, gunakayan krama désa, minakadi sawosan saking patut rahayu.

Palët 6

Indik Laluputan

Pawos 21

1. Sang sadaka, pamangku désa, prajuru désa, miwah sang sapasira hugi *sané kapiněh ñandang polih laluputan.*
2. Lwir laluputan kaungguhang sajëroning paswara pamutus pararēm Désa Pakraman Teméga.

Palët 7

Dadoşan Patědhunan

Pawos 22

Dadoşan patědunan, sangkěpan, tědun makaryya miwah sané sawosan, nganutang sukrěta sowang-sowang, lwiré :

1. Yan prajuru désa madruwé patědunané, yogya nganggén sukrětan désa, sané kagadhuh antuk prajuru désa, dadoşan ngarañjing ka désa.

2. Yan babañjaran madruwé patèdunané, yogya nganggén sukrétan bañjar sowang-sowang sané sampun kagadhuh antuk bañjar punika. Dadošané ngarañjing ka bañjar.
3. Yan subak madruwé patèdunané, yogya nganggén ugèr sukrétan subak sané sampun kagadhuh antuk subak sowang-sowang, dadosané ngarañjing ka Subak.
4. Yan sèkèha-sèkèha madruwé patèdunané, yogya nganggén hugèr sèkèha sowang-sowang, dadosané ngarañjing ka sèkèha.
5. Agung alit dadosanné sané katèrapang ring wawidangan Désa Pakraman Teméga lwiré: ring désa, ring bañjar, ring subak-subak, minakadi sèkèha-sèkèha sawosan mungguh sajèroning paswaranya sowang-sowang, saha macacirén palugrahan prajuru Désa Pakraman Teméga.
6. Yan wéntèn krama sinalih tunggal tan tinūt ring tatèpasan miwah dadosan punika, wèngang babawosé katèngahang ka désa.

Palèt 8

Indik Bhaya

Pawos 23

1. Sané kinucap Pañca-bhaya, lwiripun : Jiwa bhaya, Aghni bhaya, Toya bhaya, Artha bhaya, Bayu bhaya.
2. Salwiring bhaya wèngang gégérang antuk swaran kulkul.
3. Sang sapasira hugi krama Désa sané manggihin, wyadin huning ring *panangkaning bhaya, ring kang katibén bhaya, wèngang ngégérang nèpèk kulkul manut indik kakulkulan bhaya, raris damyakang ring wādésa.*

4. Rikāla wéntēn swaran kulkul bulus tatēngēr bhaya, krama Désa patut yatna, sayaga, saha srēgēp ngamong prabot wyadin gagawan sowang-sowang.
5. Yan sampun tatas ring bhaya punika, krama désa patut matatulung nambakin, wyadin ngamēsēhin bhaya punika, manut hunggwan, kalih manut patuduh sang yogya ngawiwēnangang.
6. Sang sapisira hugi tan kawasa majajabur ri kāla ning désa, krama désa katibén bhaya. Yan wéntēn sinalih tunggal kacirénan mamurug, yogya katēngahang ka désa, wyadin katur ring sang amawa bhumi, mangda kabawosan.
7. Yan pinganan bhaya punika sampun kapinēh nahnah, tan pacang nyēngkalén, wēnang kacihnayang antuk swaran kulkul lambat atuludan, wyadin pasyar saking sang ngawiwēnangang.

Palēt 9

Indik Pañanggran Bañjar, Krama Désa

Pawos 24

1. Salwiring karyya sané jagi kasanggra antuk désa wyadin bañjar, kapastikayang sajéroning paswaran désa minakadi paswaran bañjar, sakadi papatusan minakadi sakabwatan désa miwah bañjar.
2. Saraja karyyan désa kasanggra antuk krama désa kahunadikayang antuk prajuru désa.
3. Saraja karyyan bañjar kasanggra antuk krama bañjar kahunadikayang antuk kēlyang bañjar.
4. Yan wéntēn krama bañjar ngawangun yajña suka duka, kéngin nunas pañanggran bañjar manut pararēm bañjar.

CATHURTA SARGGAH

SUKRĒTTA TATA PALĒMAHAN

Palĕt 1

Indik Tĕgal, lan Karang

Pawos 25

1. Palĕmahan Désa Pakraman Teméga, mahugĕr antuk Tri-maṇdhala, lwiré :
 - ha. Uthama-maṇdhala: palĕmahan sané kaanggén karang pura, wyadin parhyangan.
 - na. Madhya maṇdhala: palĕmahan sané kaanggén karang pomahan, gĕnah wawangunan, sakadi: bañjar, sĕkolah, kantor, klinik, miwah sané sawosan.
 - ca. Niṣṭa-maṇdhala: palĕmahan sané kaanggén sétra, marggi, rurung, tlabah, papunduk, tulak tanggul, miwah sané sawosan. Sahanan palĕmahan sané wéntĕn ring wawĕngkon Désa Pakraman Teméga, yogya mangda madruwé babalĕdan wyadin watĕs sané pasti.
2. Sahanan palĕmahan punika, hugi mangda madruwé margi, rurung, papunduk sané dados hĕntasin.
3. *Tanah karang pomahan patut kaayahang makrama.*
4. Yan wéntĕn sinalih tunggal krama désa pacang matimbalang tanah pakarangan désa yogya polih wakwakan saking warisnya minakadi polih pamutus saking prajuru désa, manut paswaran désa.
5. Yan wéntĕn tanah karang désa camput, patut kadaut antuk désa, tur kalotrĕyang ring krama désa sané durung ngawawa karang désa.
6. Yan wéntĕn pakarangan Pura, pomahan, tĕgal, miwah palĕmahan

sawosan kaběběng tan madruwé margi, rurung, miwah papunduk, sang madruwé patut ngatěngahang babawosé ka désa, prajuru désa yogya něgděg, ngutsahayang mangda polih margi malarapan sami suka. Yan patut matumbas, manut pangargan tanah sané kamanggěhang antuk sang mawarāt. Sami katahur antuk sang mamwatang.

7. Yan désa pacang ngalinggahang margi, rurung, minakadi makarya margi, rurung désa, saking sampun ingkup paswaran désa, yan nganggén těgal, miwah palěmahan sawosan, wěnan tan nahur pangargan tanah punika. Nanging yan madaging tatanduran, papayon, wawangunan salwiré, désa patut ngicén prabéya agung alit manut parěmbug désa kala punika munggwing linggah ipun manut pamutus pararēm.
8. Sahananing karang pomahan hugi mangda masěngkěr, pidabdab ñěngkěr, magalěng ka dulu. Pañčngkěr sané sisi kangin miwah kalér, patut kakaryyanin antuk sang ngěnahin karang punika.
9. Sahananing těgal sané wéntěn sajěroning Désa Teméga, mangda ngélingang wawatěsan sowang-sowang.
10. Sang sapasira hugi ngěnahin karang těgěhan, patut naku, těgěhé asukat natah dangsah, sané bětėnan, wěnan ñusunin témbok.
11. Tělajakan karang patut kapyara antuk sang ngěnahin karang punika sowang-sowang, mangda mapikěnoh tur haśri.
12. Yan wéntěn sinalih tunggal ñadya nyalěksěk wyadin ngalěklěk babalėdan salwiring babalėdan wyadin wawatěsan, lwiré: babalėdan wyadin watěs pura, karang pomahan, těgal, sétra, tlabah, jlingjing, margi, rurung, papunduk, miwah sané sawosan, yogya katiwakan dandha manut wěrat ringan kahiwangané, saha ngantukang, mahayu sané kaslěksěk wyadin kalěklěk, kalih mrayaścita sakabwatan, sané ñandang katibanan pañangaskāra.

13. Yan hana sinalih tunggal ngalētēhin, ngarucakin, ngarobēdin, ngararabin, palēmahan liwaring pomahan padruwéyanñané, lwiré: ngutang luhu, bangkaan, miwah salwir ipun, ñorongang babañon, yogya katiwakan daṇdha gung artha manut paswaran désa, luhu, bangkaan miwah salwir ipun patut katanēm olih sang ngēntungang, tur mahayu sané kalētēhan, karucakan, karobēdan, raraban inucap ring hajēng saha mrayascitta sané ñandang kēni pañangaskāra.
14. Yan wéntēn anak ngēnahin palēmahan sajroning wawēngkon Désa Pakraman Teméga tan tinut makrama désa nganutin awig-awig miwah paswaran désa, tan kalugra nganggé salwiring padruwéyan désa, tan kalugra ngalakṣaṇayang pañca yajña sajroning Désa Teméga. Yan tēkaning kapatyan dados ñawubang utawi pēndhēm ring sétra tēbén (sétra pangilang-ilangan), tan polih pañanggran krama bañjar minakadi pañanggran krama désa.
15. Sang sapisira ugi madruwé tanah tēgal, carik, ring wawēngkon Désa Teméga, *yan pacang ngadol sukatan, bungkulan, maparah-parah, ugi mangda polih palugrahan saking Bēndésa Tēméga. Yan tan polih palugrahan, prasiddha indiké punika kahandēgang..*

Palēt 2

Indik Kakayonan

Pawos 26

1. *Tan kalugra nēbtēb, ngarēbah, wit-witan salwir ipun, ring patēgalan, habing, tangkid, miwah gēnah sawosan sané kakēkēr antuk désa. Yan wéntēn sinalih tunggal mamurug, katiwakan daṇdha manut lokika, manut paswara, taru sané karēbah mantuk ka désa.*
2. Yan wéntēn wit-witan wyadin kakayonan ngungkulin palēmahan anak

sawos, sané ngawinang tiyēb, tampias, ngarobēdin, asing kungkulan wēnang ngatēngahang ka dēsa, prajuru dēsa maritētēs saha mituduhang sang madruwé mangda ngrañcap, nēbtēb, wyadin ngarēbah. Yan kantos ping tiga pituduh dēsa tan kalingu, wēnang katiwakan daṇdha sang anikēl tuduh, gung artha manut paswara Kakayonan punika prasiddha karēbah antuk dēsa picuṇḍhangan.

3. Tanēm tuwuh jroning karang pomahan, tan kalugra tēgēh ipun lintangan ring jan palit solas, wyadin limang mētēr, bungkil ipun adēpa agung, wyadin kalih mētēr tēngah, saking pañēngkéré ngajērowang. Yan mamurug, wéntēn raris ngatēngahang ka dēsa, yogya sang madruwé katiwakan daṇdha gung artha manut paswara; saha ngarēbah sajroning tigang rahina saking pamuput babawosé.
4. Kakayonan jroning karang pomahan hugi mapyara mangda tan ngalētēhin, ngarobēdin, mamayén karang sawosan, saking akah kantos daun ipun. Yan wéntēn mamurug, tan tulinga ring kakayonan duwé wéntēn ngatēngahang ka dēsa, prajuru dēsa yogya maritētēs, saha nēpasin manut panglokika kalih paswaran dēsa.
5. Yan wéntēn wit taru mēntik kantos agēng ring babalēdan, watēs, salwiring babalēdan mwan watēs, wéntēn ngatēngahang ka dēsa, patut taru punika karēbah antuk dēsa, raris pinara tiga, apahtigayan mantuk ka dēsa, sang maduwé babalēdan apahtigayan sowang-sowang.
6. Yan wéntēn sinalih tunggil nundungin tanēm tuwuh, kakayonan, sané kaswatah pacang mamayén, wēnang kabawosang ring sang madruwé. Yan akas sang madruwé, yogya katēngahang ka dēsa. Prajuru dēsa nēgdēg tanēm tuwuh wyadin kakayonan punika. Yan manut panglokikan prajuru dēsa yogya tundungin, talēr akas sang madruwé, patut sēpat gantungin. Yan jati kadi pañwatahé yogya sajroning tigang dina, karēbah picuṇḍangan. Sang madruwé katiwakan daṇdha gung artha manut

- paswara doṣané anikēl tuduh. Yan tan yukti kadi pañwatahé, sang ngatēngahang katiwakan daṇdha gung artha manut paswara, doṣané angadakakēn nora. Tanēm tuwuh wyadin kakayonan punika tan karēbah.
7. Sang kēni pamidaṇdha pañangaskāra saha prabéya manut pamutus pararēm désa marēp ring wawangunan sang karubuhin lwiré:
- ha. Sang nruwénang wit taru sinanggēh mayanin pradé pungkak ngarubuhin wawangunan krama sawosan;
- na. Sang munggul utawi ngarēbah taru sané ngarubuhin wawangunan krama sawosan.
8. Yan wéntēn sinalih tunggal ṇadya nandur pijēr, turus, salwiring tanēm tuwuh wyadin kakayonan sané pacang dados agēng, nēsēk ring babalēdan, ring watēs, papunduk, hugi mangda masupéksa ring prajuru désa, kalih ring pañanding sowang-sowang. Yan tan kalugra tan kapisukayang, pradéné talēr kapurug, yogya sang mamurug katiwakan daṇdha gung artha manut paswara tur ngamadhēmang tatandurané.
9. Yan wéntēn krama nandur pijēr, cēngkéh, salak, poh, bulwan, durén, wani, miwah sapanunggilan ipun, sané tuwuh ipun pañjang ring tēgal sasakapan, hugi mangda makaryya pasobhaya ring sang madruwé tēgal hinucap. Yan durung pinganan mawoh tatanduran punika, durung nahēn ngalapin woh ipun pinih sor limang palabuh, durung manut pacang rēbah raris kajabutan, yogya sang madruwé tēgal nawur pañjala sawit sawit, gung artha manut paswara, wyadin pasobhaya.
10. Sang sapisira hugi krama désa tan kapatutang nandur kakayonan sané mawoh ring pinggir margi, minakadi rurung désa.
11. Sang sapisira hugi ṇakap tēgal, tan kawaśa ngarēbah tanēm tuwuh sané dados anggén laku wawangunan, yan tan polih lugra saking sang madruwé tēgal minakadi palugrahan prajuru désa.

12. Sang sapisira hugi tan dados ngarampang kakayonan druwen désa, napi malih pënghijauan désa, yan wéntën mamurug kadaṇdha manut paswaran désa.
13. Krama désa patut ngamanggëhang kawërdhyan tanëm tuwuh sané ngawinang désané asri tur lëstari.

Palët 3

Indik Wawangunan

Pawos 27

1. Sang sapisira hugi krama désa sawawëngkon Désa Teméga, yan pacang ngawangun pañëngkër karang pomahan, patut masupékša ring pañandingé. Yan tan radin yogya nunas dëgdëgan ring prajuru désa, prajuru désa nëgdëg saduhajëng sang mawicara.
2. Wawangunan ring palëmahan pëcak tëgal, palëmahan suwung, sané sampun masanggah pawon, palëmahan punika prasiddha kabawos karang pomahan, dwaning sampun katiwakan pangupakāran karang. Awanan patut madruwé rurung bétél ka marggi agung, sukat dados pacang ngalintangang papaga, dwaning tan kapatut ngalintangang sawa ring carik miwah tëgal, yan wéntën mamurug, yogya prajuru désa niwakang tatëpasan mangda sang mamurug mrayaścita palëmahan hinucap sané kalintangin.
3. Yan tan masanggah pauguluning karang, kabawos akakubon. Tan yogya gënah ngrakša sawa. Yan wéntën mamurug yogya katiwakan pamidaṇdha mangda mrayaścita palëmahan punika.

4. Yan wéntěn sinalih tunggal sang sapisira hugi pacang ngawangun wawangunan gēnah ngalakṣanayang upacara āgama lwiré: Pura, Masjid, Geréja, Wihara, miwah sané sawosan, hugi mangda wéntěn lēkita palugrahan Prajuru Désa, kalih lēkita palugrahan Guru Wiśéṣa. Yan wéntěn mamurug kadi kinucap ring hajēng, kabawos tan siddha kāryya, tan wēnang anggēnēn, tur wawangunan punika yogya wangdéyang.
5. Wawangunan jroning karang pomahan, hugi nganutin Tri-maṇḍhala; utama maṇḍhala, sanggar panguluning karang. Madhya maṇḍhala, pagēnahan mapumahan. Niṣṭa maṇḍhala, ngaran lēbuh, jabayan.
6. Tan wēnang ngungkulang capcapan wawangunan ka jroning karang pomahan sawosan tani druwé. Yan wéntěn mamurug, wéntěn ngatēgahang ka désa, yogya prajuru désa nēgdēg, saha ṇipāt gantungin. Yan jati lintang, sajroning selahé rahina saking puput babawosé mangda sampun kapastika.
7. Tan wēnang nganggén témbok umah wyadin témbok pañēngkēr tani druwé. Wēnang ya kasambatsara antuk sang madruwé. Yan akas tur mamurug sang kasambatsara, yogya katēngahang ka désa, kabawosan antuk prajuru désa.
8. Sang sapisira ugi pacang mapawangun nēpi ring marggi agung, nēpi ring rurung désa, yogya wéntěn lēkita palugrahan saking prajuru désa, wyadin lēkita sang amawa rāt. Yan tan polih lekita palugrahan, ritatkāla wawangunan punika katundungan tan ngétang prabéyan tatundungan.
9. Sang sapisira hugi ngawēngku karang pomahan, yogya hurati myara kahaśriyan lēbuh pakaranganya, rurung pēntasan pinih sor asukat karangnya ngalajur, tan dados ṇorongang babañon ka jaba, minakadi majajēmuhan ring jabayan karang.

Palët 4

Indik Wawalungan

Pawos 28

1. Sané kinucap wawalungan, sakañcan buron suku pat sané ñadya kapyara, sakadi: bawi, banténg, kambing, këbo, misa, jaran, miwah sapanunggilan ipun. Talër watëk makampid sané ñadya kapyara, sakadi: ayam, itik, hangsa, dolong, miwah sababacakan ipun.
2. Sang sapa sira hugi krama désa sané myara wawalungan suku pat, sajaba hasu, tan wëñang ngalumbar. Sané patut matlusuk, mangda matlusuk. Sané tan patut matlusuk, mangda matëgul bawong. Sané patut maglogor, makandang, patut maglogor wyadin makandang. Mangda tan ngarucakin, ngalëtëhin palëmahan tani druwé, miwah mamayéñ krama désa, jana pada. Yan hasu mangda mabélat, lwiré makalung bawong, maka cihna wéntën sané myara.
3. Sang sapa sira hugi krama désa, myara watëk suku kalih, watëk makampid, yatnain hugi, mangda tan bangët ngarucakin, ngalëtëhin, pomahan, tatanduran druwén anak sawos.
4. Tan wëñang ngangonang, nëgulang, hingon-hingon ubuh-ubuhan, ring palëmahan tan druwé, minakadi tan sasakapan druwé, yan tan kapisukayang. Sang madruwé palëmahan, prajuru désa, langlang désa, këliyang-këliyang asing mamanggihin, wëñang ñambatsara sang madruwé wawalungan ika. Yan hakas sang kasambatsara, wawalungan ika wëñang taban, prajuru désa yogya niwakang pamidañdha, manut lokika, gung artha manut paswara.
5. Tan wëñang ngangonang, nëgulang ubuh-ubuhan, ring palëmahan karang pura, kahyangan salwir ipun, minakadi sétra, rurung, papunduk, margi, tëlajakan, palëmahan sané kapingitang, karang suwung, miwah sababacakan ipun. Yan wéntën mamurug, sang madruwé palëmahan,

langlang désa, kēliyang banjar, prajuru désa sinalih tunggal asing mamanggihin, wēnang ñambatsara, saha naban wawalungan ika, katēngahang ka désa, katiwakan daṇḍha gung artha manut paswara, saha mahayu yan wéntēn karusak, tur mrayascita palēmahan ika sané ñandang prayascita, manut panglokika.

6. Yan wéntēn maubuh-ubuhan sajroning karang pomahan, hugi tlajan mratyakṣayang kandang ipun mangda tan ngawētuwang bhaya, panungkan mahambu tan bēcik. Talēr mangda hapik, guritén, sikṣa, mangda tan kantos ngalētēhin, ngobētín, cērobo karang pomahan wyadin palēmahan pañandingé. Yan wéntēn mamurug, tan sikṣa ring hingon-hingon miwah kandang ipun, wēnang pañandingé ñambatsara wēnang katēngahang ka désa, prajuru désa nēpasin. Wēnang katiwakan daṇḍha, manut panglokika kalih paswaran désa.
7. Sang sapisira hugi krama désa ngawangunang kandang wawalungan; buwat adol atuku, kandang ayam ras, itik, miwah sapanunggilan ipun, buwat naluhang, miwah adol atuku, dagingan 10 ukud. Yan kandang wawalungan suku pat, dagingan 4 ukud sowang-sowang, ikā wēnang jroning karang pomahan. Yan lintangan ring punika daging kandangé, tan wēnang wangunang jroning karang pomahan, yogya kawangunang ring palēmahan sané mawanēng sator ipun satus dēpa saking palēmahan karang pomahan, sēkolah, kantor, pura kahyangan, minakadi gēnah sané kakēkēr wyadin kapingitang antuk Désa Pakraman Teméga. Tur mangda madruwé lēkita palugrahan saking sang amāwa bhumi.
8. Yan wéntēn wawalungan ngarucakin, ngarug tatanduran, wēnang taban. Sang madruwé tatanduran ngatēngahang ka désa pramangkin, kabawosan antuk prajuru désa, saha katiwakan daṇḍha manut lokika paswaran désa.
9. Yan godél banténg, durung matlusuk, godél jaran utawi babēdag, kambing, miwah sabacakan ipun, durung hantēs matēgul, tan wēnang taban, yan tan ngajak hinan ipun. Yogya salabarang ring sang madruwé.

10. Yan bébék, dolong, hangsa, ayam, miwah sapanunggilan ipun, talér wěng taban. Indiké naban, mangda masakši, saha kasupékşayang ka désa pramangkin, prajuru désa yogya mamawosin, niwakang pamidaᅇdha manut panglokika.
11. Yan wéntěn wawalungan ngěléb, mamėgat, ngarañjingin palėmahan pura, kahyangan, sétra, karang pomahan, miwah sané sawosan, lokikaněn juga. Yan tan ñadya ka lébang tan yogya taban, wěng salabarang ring sang madruwé.
12. Sang sapisira hugi krama Désa Teméga, tan kalugra ñorongang babañon lalětėh kandang wawalungan ka pakarangan tan druwé, jalingjing sane wéntěn sajroning Désa Teméga. Yan wéntěn mamurug katiwakan daᅇdha antuk désa gung artha manut lokika, saha paswaran désa. Tur sajroning pitung rahina saking pamuput babawosé, salantur ipun tan kari sorong lalětėh miwah babañon punika.
13. Tan kalugra mēdil, nulup, ñaring, minakadi salwiring pamargi pacang ngėjuk pakši saha mortas, nyėtrum ulam ring wawėngkon Désa Pakraman Teméga, yan wéntěn mamurug katiwakan daᅇdha, gung artha manut paswaran désa.
14. Agung alit dadaᅇdhan punika kahurgguhang sajėroning paswaran Désa Teméga, nanghing lokika juga wiśėşa.
15. Sakañcan dadaᅇdhan, dadoşan sané mungguh ring hajėng, sami mantuk ka Désa Pakraman Teméga.

PAÑCAMA SARGGAH
SUKRĒTHA TATĀ AGAMA

Palēt 1

Indik Déwa Yajña

Kaping 1

Indik Parhyangan

Pawos 29

1. Pura Désa, Pura Pasar Agung, Pura Pasucian Tirta Gangga, Pura Mēlanting miwah sané sawosan sané kadruwé antuk désa kahēmponin antuk désa, indik pangaci-aci manut kuna drēṣṭa kētah kalih paswaran Désa Teméga.
2. Pura-pura Kahyangan, sané sawosan ring sané kinucap ring hayun, papayon kalih pangaci-aci kahēmponin antuk pamakṣan krama pura, sané ñungsung Bhaṭāra ring Pura Kahyangan punika sowang-sowang.
3. Yan wéntēn karēcēhan, wicara, sajroning pangēmpon Pura, kahyangan, subak minakadi sēkēha-sēkēha sinalih tunggal, wēnang katēngahang ka désa, prajuru désa mamawosin, ñahsahang, nēpasin wicarané, mangda kasiddhan mawali laṇḍuh jatimula.
4. Tan wēnang nguwah nguwhin wawilangan palinggih bhaṭāra, sané sām̐pun wéntēn ring Pura Kahyangan sowang-sowang, mangda kantun manggēh kadi kuna.
5. Yan wéntēn sinalih tunggal Pura Kahyangan, rēṇēng pangaci-acinya kantos kadaśawarṣan, yogya prajuru désa mamawosin, maritētēs, ngutsahayang mangda kasiddhan mawali kadi jatimula, nānghing pradē tan kasiddhan, majalaran antuk pamutus paruman désa, prasiddha désa

ngwangunang ngupacāra mraliṇa pura punika, mangda tan karañjangan
kaumahin antuk Ki Bhuta Kubandha.

Kaping 2

Indik Pangaci-aci

Pawos 30

1. Indik pangaci-aci ring pura-pura kahyangan sané wéntèn ring
wawēngkon Désa Pakraman Teméga, khamongin antuk krama désa,
manut hēmponan wyadin pamakṣan sowang-sowang, sajaba sané
kahēmpon antuk krama désa sami. Sowang-sowang pura madruwé ketah,
pinaka hugēr pangaci-aci, miwah babantèn.
2. Sané yogya muput haci-aci ring pura Kahyangan sané kadruwé antuk
Désa Pakraman Teméga, manut drēṣṭan pura sowang-sowang.
3. Yan wéntèn sinalih tunggal Pura durung madruwé Pamangku, utawi
Pamangkuné kapyalang, dados nuhur sinalih tunggal pamangku
Kahyangan Désa, pradé talěr tan mrasidhayang patut nuhur Ida sang
maraga sulinggih sané kabriyukin antuk krama désa.
4. Pamangku désa, punika wantah pamangku, sinamyan sané kaadėgang
antuk Désa Pakraman Teméga kalugra ngantėb bantėn pangodal
minakadi sané sawosan ring pura-pura Désa Pakraman Teméga sané
mamwatang, talěr manut kawėnangan Pamangku.
5. Ri tatkāla désa ngawangun kāryya Tabuh Gėntuh, Bhaṭāra turun kabėh,
minakadi kāryya agung sawosan, désa wėnang ģarad pamangku-
pamangku kayangan sakatahé, pacang ngarombo Pamangku Désa.

Pawos 31

Indik pangaci-aci ring Pura Pamrajan, Pahibon, Dadya, punika kahamongin antuk krama désa sajroning sèkèha dadya, pamrajan, manūt sima drèštanya sowang, tan singsal ring ucaping śāstra Agama Hindu.

Pawos 33

Aci-aci, piodhalan, usabha, pasègèh ring Kahyangan lwiré:

1. Pura Ulun Sui Pasucian Tirta Gangga rahina Purnama.
2. Pura Pasar Agung Catus Pata miwah Pura Melanting rahina Tilēm Kasanga.

Pawos 33

1. Haci-aci kasanggra antuk krama désa.
2. Lwiring babantèn minakadi hééd upacāra, manut gagaduhan drèšta kuna sowang-sowang pura.
3. Padagingan pacang ngaci-aci:
ha. Rarampagan;
na. Piturunan utawi wawijilan krama désa;
ca. Pyolih-olih pagunakayan krama désa;
ra. Haturan-aturan sangkaning krama suka nirmmala.
4. Pasègèh tunggil Kajēng Kliwon, Purnama, Tilēm, kasanggra antuk pamangku sowang-sowang. Padagingan saking druwén pura, pamakšan kahantèbang antuk pamangku sowang-sowang.

5. Sané kalugra maput salwiring aci-aci ring pura pañungsungan Désa Pakraman Teméga, manut drěšťan pura sowang-sowang.
6. Ri kála kabrěbėhan jagaté, kagringan, katibén pañca-bhaya, pinganan tan mrěsiddhayang ngaturang haci kadi patuté, yogya prajuru désa miwah pamangku, ngaturang pyuning ring Bhaťara, masadhana babantėn padhatėngan, pacanangan, maka cihna tan pėgat haci-aciné. Ri wus mawali đėgdėg jagaté, patut masasirih makakobok ka sagara giri.
7. Yan ri tatkala mamahayu, ngayum papayon, ring pura-pura kahyangan, pinganan tan puput kála dinaning piodalan, pangaciné wėnang rangkadang, nanghing padatėngan, pacanangan, tan dados pėgatang. Ri wus puput masasapuh salwiré, malih mawali kadi kuna.

Kaping 3

Indik Pamangku

Pawos 34

1. Pidabdab ngadėgang pamangku lwiré :
 - ha. Ngambil saking sasėrod santana wyadin katurunan;
 - na. Sangkaning kajujuh saha kabriyukin antuk krama Désa Teméga.
 - ca. Nėkar para Pamangku Dadya, wyadin ñjañjan sasampun kantos ping tiga;
2. Sané tan wėnang kaadėgang dados pamangku:
 - ha. Cėdangga lwiré: pėcéng, pérot, cungh lan sapanunggilan ipun;
 - na. Mabukti sungkan;
 - ca. Mabukti nahėn malakřana corah.

3. Sang sapasira hugi pinaka jan banggul, pamangku ring pusèh Teméga minakadi ring Pura Kahyangan sajroning Désa Teméga, mangda pagèh ngalakṣanayang śāsanān Pamangku.
4. Sang sapasira hugi krama désa, sangkaning sasērod, sangkaning kasēnēngan antuk Bhaṭāra polih pamuwus ring sasēmburan, minakadi kajujuh kabriyukin antuk krama désa, pacang kaanggén pamangku, yan kari alaki rabi yogya lanang istri mawintēn.
5. Sang kasudi pacang kaanggén Pamangku, patut mawintēn ring Pura gēnahé dados pamangku, mungging prabéya kasandangin antuk pamakṣan pura sowang-sowang, yan ring désa antuk krama désané sami.
6. Pamangku patut madruwé hamongan pura sowang-sowang. Yan tan madruwé hamongan pura, prasiddha tan kalugra ngantēbang babantēn ring pura-pura salwiré.
7. Yan wéntēn sinalih tunggal pamangku katēkan pati, ritatkālaning dina larangan désa tan dados ngēsēng śawa ring sétra, layon jro mangku dados pēṇdhēm, manut tata kramaning mēṇdhēm layon pamangku, polih patulung saking désa bēras 100 kilogram, minakadi kasa 20 mētēr kang sadiri.
8. Sinalih tunggal pamangku désa yan katēkan pati, sajaba dina larangan désa tan dados ngēsēng, patut tiniwakēn, mungging prabéya patatiwan sakadi ring sor puniki:
ha. Yan pamangku lanang sané hantaka, turmaning désa sané ṇanggra
upacāra punika, prabéya sami kaangganin antuk désa;
na. Yan pamangku lanang sané hantaka turmaning pratisēntana
minakadi pasēmētonan pamangku sané ngalakṣanayang upacāra

patatiwan punika, saking désa polih bĕras 1000 kilogram, yan wus tiniwakĕn patut kakaryyanang pangĕlad wyadin papĕgatan antuk sang ngabĕnang;

ca. Yan pamangku istri rabin pamangku sané hantaka, munggwing upacāra pitra yajña kasanggra antuk santanan wyadin pasĕmĕtonan, patut polih bĕras 500 kilogram. Yan wus tiniwakĕn patut kakaryyanang pangĕlad wyadin papĕgatan antuk sang ngabĕnang.

9. Phala pékṣaning pamangku lwiré:

ha. Luput ayah-ayah kalih patĕdunan désa lan bañjar;

na. Luput papĕson upakāra ring ĩura samyan sané kahĕmong antuk désa;

ca. Polih duman sasarin canang manut pararĕm désa;

ra. Polih cĕnĕngan (patuas) manut panglokika;

ka. Polih bhuṣaṇa arangsukan duk ngawit ngawintĕnin, minakadi kahungkur manut panglokika.

10. Pamangku kagĕntosin majalaran antuk :

ha. Séda;

na. Mapinunas mararyyan, saking patut pinunasé, nānging tan kari ngalakṣaṇayang dharmmaning Pamangku. Kawĕkas kalaning séda, tan polih patulung prabhĕya atitiwa;

ca. Saking patut pinunasé, majalaran antuk lingsir, sampun tan mampuh, sungkan rahat tan kĕngin waras. Kajadayang antuk krama pura, wyadin désa. Kawĕkas kalaning séda patut polih patulung prabhĕya patatiwan;

ra. Sangkaning kahusanang, majalaran antuk lakṣaṇa mamurug śāsan

pamangku. Kawēkas kālaning séda tan polih patulung prabhéya atitiwa;

ka. Pamangku désa sané kawusanang majalaran antuk mamurug sasanan pamangku patut ngawalyang prabéya pawintēnané nguni.

Kaping 4

Indik Sukrēthan Pura Kahyangan

Pawos 35

1. Rikālaning maturan hamung pamangku ring kahyangan punika dados *munggah tēdun ring palinggih-palinggih pura kayangan inucap minakadi sang sām̄pun polih lugraha saking prajuru désa. Yan wéntēn mamurug katiwakan daṇdha mrayāścita palinggih punika.*
2. *Pamangku sané patut ngantēbang babantēn ring pura, wantah pamangku sané kadruwé antuk pura punika. Yan néntēn wéntēn pamangku ring pura punika, utawi kapyalang, dados ĩarad pamangku sawosan, saking palugrahan prajuru Désa Teméga.*
3. Tan kalugra masumpah, macoran, sajroning pura kahyangan sinalih tunggil, sajaba sangkaning wicaran pura hinucap, talēr saking pabwat krama pamakṣan pura, utawi pabwat krama désa sané ngēmpon pura punika.
4. Tan kalugra wak capala, hasta capala, pāda capala, sajroning pura kahyangan. *Yan macihna wéntēn mamurug, wéntēn raris ngatēngahang ka désa, yogya tiniwakan daṇdha manut pangarggan bēras adaśa kilogram, saha pamarisuddhan kahyangan.*

5. Tan kalugra malakṣaṇa kantos ngawētuwang byota ring pura kahyangan.
yan wéntēn mamurug kantos maywadi ring pura, yogya tiniwakan daṇḍha
gung artha manut pangargan bēras adaśa kilogram kang sadiri, saha
marisuddha kahyangan punika.
6. Sang sapaśira ugi kacuṇṭakan, salwiring cuṇṭaka, yan durung mabrēsih,
tan kalugra ngarañjing ka Pura Kahyangan. Yan katēngēr wéntēn
mamurug, yogya tiniwakan daṇḍha marisuddha kahyangan punika.
7. Sēdahan hēngengan miwah sapanunggilan ipun tan kalugra masēha ring
Pura Kahyangan sinalih tunggal, sajaba ñañjan pamangku.
Yan wéntēn mamurug, yogya daṇḍha gung artha manut paswara, saha
ngawangdéyang masēha.
8. Tan kalugra ngawéntēnang kaklēcan, jajudén, sajroning sutēr Pura
Kahyangan. Yan wéntēn mamurug, sang ngalaksanayang katur ring sang
amawa rat, tur kaklēcan jajudén punika kawangdéyang.
9. Tan kalugra makta salwiring sané kasinanggēh tan suci ngarañjing ka
jroning sutēr Pura Kahyangan. Yan wéntēn mamurug, yogya sang
mamurug marisuddha pura punika.
10. Sang sapaśira ugi rikalaning makēmit ring Pura Kahyangan, yan mērēm,
tan kalugra madukan lanang istri, sajaba anak sané kapinēh kari alit,
durung rumaja putra. Yan mamurug kēni daṇḍha manut pangargan beras
adaśa kilogram kang sadiri, tur mrayascita pura punika.
11. Pamakṣan sowang-sowang Pura Kahyangan sawawēngkoning Désa
Pakraman Teméga, kalugra madruwé sukrēta ndiri-ndiri, nanging tan
dados singsal ring pasukrētan Désa Pakraman Teméga.

12. Pura kahyangan désa tan wénang anggén sajaba ngalakṣaṇayang upacāra agama Hindu. Yan wéntèn macihna mamurug sang malakṣaṇa kawangdéyang, tur pakardinya kapucĕh, saha sang ngalugrahin kadaṇdha manut pangangan beras adaṣa kilogram, mawĕwĕh ngawéntĕnang upacara panyangaskara pabrĕsihan.
13. Yan wéntèn macihna anak wyadin sang sapisira hugi, katĕdunan utawi kapangluh sajroning Pura Kahyangan sawawĕngkoning Désa Pakraman Teméga, mababawos minangkĕnang pangandikan Ida Ratu Sasuhunan utawi Bhaṭāra, ring gĕlis tunasang tirtha laluputan mangda gĕlis hudĕp. Pradé sasāmpun kakĕtisin tirtha, kantun ngatémél maséra-maséro, ngawĕtwang sumandéya kayun kramané, irika patut pintonin, hambalang toya apané, cĕlēbang liman nyané makakalih. Yan mabukti tan bĕlus, ñandang gĕga pangandikan Bhaṭāra. Yan pradé bĕlus, tan ñandang gĕga, gĕlisang gingsirang gĕnahang mangda doh saking pura punika, turmaning kĕni dadoṣan manut paswara.

Kaping 5

Indik Cuṇṭaka, miwah Sosot

Pawos 36

1. Sang sapisira hugi krama désa sané kahanan cuṇṭaka, tan wénang ngarañjing ka Pura Kahyangan, ka pañuciyan kāla ning ñuci gĕning, minakadi gĕnah salwiring gĕnah sané kinucap suci pingit. Tan wénang ngaryyanin saji salwiring saji sané pacang katur ka Sanggar Tawang, sakadi suci gĕning, minakadi bantĕn salwir ipun sané jaga katur ka pura,

miwan sané katur ring piära pindha. Munggwing bantén sané pacang katur ka Pura Dalëm minakadi Prajapati panguluning sétra, dados karyyanin ring umah sang cuṇṭaka kălaning ngupakăra śawa.

2. Lwir sané kinucap cuṇṭaka:

ha. Auak istri kălaning ngrajaswala, suwén cuṇṭakané, saking ngawit ngrajaswala, kantos ñat, macihna sampun malukat;

na. Sang ngantén lanang istri., suwéné cuṇṭaka, ngawit saking rahina panganténané, wyadin rahina marangkaté, saha puput mawidhi widhana pawiwāhan;

ca. Răma répa cuṇṭaka sangkaning madruwé oka. Sané lanang cuṇṭaka, suwéné saking mbas anaké alit kantos kėpus oděl ñané, raris malukat. Sané istri pinaka réna, cuṇṭaka pětang daśa kalih dina saking wahu ěmbas raréné;

ra. Anak istri karuron, patėh cuṇṭakané ring anak ngėmbasang oka, rabiné cuṇṭaka solas rahina.

3. Cuṇṭaka malarapan antuk kasėdayan, kapatyan :

ha. Yan sang ngarėpin, suwėnné cuṇṭaka saking wawu séda kantos puput kăryyané macihnayang punah cuṇṭakané antuk marėrėbu;

na. Sang polih niñjo, ngarap śawa, nggamėl saha ngarėmbat sahétėh-ėtėh upakăra pula-palining śawa, cuṇṭaka sadina, punah cuṇṭakané macihnayang antuk masiram malukat.

ca. Yan sang mañjing mijil ring umah sang ngarakśa śawa, sasuwén śawa wyadin layoné karakśa, patėh cuṇṭakané kadi sang ngarėpin śawa ikă, luwih yan tunggil siddhikăra, patėh cuṇṭakané kadi sang

ngarēpin śawa ika.

- ra. Yan sang mañjing mijil ring umah sang ngarakśa śawa wyadin layon, sangkaning aniñjo, punah cuṇṭakané sasampun masiram, malukat;
- ka. Sēbēl karang dados margyang saking ngawit nēgtēgang daging kantos Ida Bhaṭāra masinēb. Wawanēngan sēbēl karang hamung ring sang magēnah sajroning karang sané kacuṇṭakan, yan wéntēn sēda dados pacang ngamargyang sēbēl karang patut pēṇḍēm makingsan kālaning wēngi, tan polih pañanggran bañjar utawi déśa.
4. Cuṇṭaka sangkaning malakṣaṇa mamitra ngalang. Suwénne cuṇṭaka, salaminé mamiṭra ngalang.
5. Anak wētu sangkaning smara dudu utawi tan pawidhi widhana pawiwāhan, babiñjat, punika talēr cuṇṭaka. Suwénne cuṇṭaka, salaminé durung wéntēn mēras, wyadin nuduk ngangkēnin pyanak utawi nganggén dadaman.
6. Cuṇṭaka sangkaning mabukti madruwé pañungkan sané tan siddha waras salaminé, kadi hangganing hila, buduh, ngawijilang rēgēd saking silit, bhaga, purus, tan hēnap mamērēs. bērung borok tahunan mabañēh, miwah salwir punika. Suwéné cuṇṭaka, salaminé tan waras.
7. Cuṇṭaka sangkaning cédāngga punika tan kawēnang napak palēmahan pañucyan gēnah ñuci gēning.
8. Yan wéntēn sinalih tunggil sang cuṇṭaka ngarakśa śawa wyadin layon, mamanah utawi mapakayun ngarawuhin karyya hayu atma wédhana, minakadi mabhakti ring sang wēnang bhaktinin, dados, nanghing tan

- wĕnang ngarap, ngarĕmbat, ņuwun, ngamĕl, saupakĕran puṣpa lingga.
9. Yan wĕntĕn sinalih tunggal krama dĕsa durung tutug cuṇṭaka kadi ucaping harĕp, mamurug larangan, yan wĕntĕn ngatĕngahang ka dĕsa, prajuru dĕsa niwakang pamidaṇḍha, yogya sang mamurug marisuddha sakabwatan manut panglokika.
10. Yan wĕntĕn sinalih tunggal anak istri, sangkaning tan mĕhā ngrajaswala sasampun ring pura, wyadin ring gĕnah laranganĕ sawosan, raris kacirĕnan, wĕnang ya tiwakin daṇḍha tanmĕhā, yogya marisuddha gĕnah punika, katulung antuk pamakṣan pura wyadin pangĕmongĕ sowang.
11. Ri kĕlaning krama dĕsa tĕdun makaryya, sang kacuṇṭakan tan kĕni ayahan.
Yan mamĕdhĕk hamung dados ring niṣṭa maṇḍhalaning pura utawi ring jabayan. Yan mamurug wĕnang kadanda mrayascita.
12. Yan wĕntĕn sinalih tunggal krama dĕsa, kacuṇṭakan antuk ngrakṣa ṣawa, wyadin layon, napkala pagilih pagantosan subak babañjaranya ngaci-aci ring sinalih tunggal kayangan dĕsa, pacarwan ring dĕsa, sadurung tutug sĕngkĕr cuṇṭakanya, wĕnang tan tĕdun mĕyahan, tan dinosan, anghing yan wĕntĕn pasadok sang cuṇṭaka ring prajuru dĕsa. Yan wus tutug cuṇṭakanĕ, patut narĕgtĕg yan kari ngalantur patĕdunanĕ. Munggwing piturunan, wawijilan dazing salwir ipun, yogya katahur narĕgtĕg sasampun tutug sĕngkĕr punah cuṇṭakanĕ. Dados kahĕtang pangargga.
13. Yan cuṇṭaka gamya gamana, prajuru dĕsa ņantosang pamuput sang amawa rat. Yan sampun wĕntĕn pamutus saking sang amawa bhumi, ring dĕsa katiwakan danda kadi ring sor puniki, lwirĕ: mangda mrayascita raga, gĕnah malaksana, kahyangan dĕsa, miwah dĕsa pakraman. Pradĕ yan

sang katiwakan pamidanda mamandal, prasiddha désa sané mrayascita désa miwah kahyangan, sang mamandal kabawosan ring désa, kicchén pamutus antuk prajuru désa, manut pamutus pararēm désa.

14. Cuṇṭaka sangkaning mabukti salah timpal, cuṇṭaka ragan sang malakṣaṇa miwah désa pagēnahanya, tutug cuṇṭakanya yan sampun sang malakṣaṇa mrayascita pañangaskāra raga, gēnah malakṣaṇa, désa mrayascita désa. Buron sané kaajak matēmu smara kapadhēmang, bangkén ipun katanēm.
15. Anak luh bēling tan kaparyangkēn, suwēnné cuṇṭaka kantos sasāmpun wéntēn upacāra byakawon saha kēni pamidaṇḍha manut pangarggan bēras 50 kilogram.
16. Yan wéntēn anak mabukti ñolong smara, cuṇṭaka patēh ring cuṇṭakan gamya gamana.

Pawos 37

1. Indik Sosot:

- ha. Yan wéntēn sinalih tunggal pacang nahur sosot wyadin punagi, salwiring punagi, gumanti sané patut nganggén pamēgat sot, dados nahur sot yan tan kālanning dina piodalan Bhaṭāra, ngalimang dinayang mapanahuran patut sampun masadok ring pamangku pamakṣan pura, yan ring kahyangan désa panahurané, masadok ring prajuru désa. Panahuran punagi ika, kapuput antuk pamangku désa.
- na. Yan wéntēn sinalih tunggal nahur sasangi pacang ngaturang pangodal, hugi mangda ring dina pagantosan pyodalané. Sang nahur punagi, wēnang ngaturang upakara yadnya sapuputnya.

ca. Yan wéntèn sinalih tunggal nahur sasangi, maturan swaran tangguran salwiring tatabuhan, sasolahan minakadi salwir ipun, mungging prabhéya punika sami kaangganin antuk sang masasangi.

2. Haturan:

Yan wéntèn sang sapisira hugi ngaturang jinah, mwan sarupaning barang, punika sami patut kahunadikayang antuk prajuru désa, kělyang pamakšan pura sowang-sowang, mangda kasiddhan mapwara hayu. Haturan punika kaungguhang sajroning lěkita.

3. Sasarin Canang:

Sasampun puput pangaci-aci pūja waliné, sasarin canang punika kapupulang saha kawilangin. Kahunadikayang antuk prajuru désa, pamangku désa, indik tatiwak kalih pamargin ipun, sangkaning jati nirmala.

Palět 2

Indik Rěši Yajña

Pawos 38

1. Krama Désa Teméga, yogya ngawrědiyang kaprajñanan, kaultaman Sang Hyang Aji, aséwaka nunas pawarah ring sang maraga widagdha prajñan, pingajěng ring sang kasinanggěh guru loka.
2. Prajuru Désa, kělyang bañjar, ngutsahayang kawrěddhiyan kamuruban kaultaman Sanghyang Aji, ngawéntěnanng pasamuhan-pasamuhan, parěmbugan, pinaka gěnah krama désa mamungguhang pawarah-warah

hayu.

3. Kālaning diwasa hayu, wēnang désa atīrtha yatra, wēnang désa ngaturang punya miwah rēṣi bhojana ring Ida sang maangga Sulinggih. Talēr kālaning karyya utama ring désa, salwiring kāryya sané kaputus antuk ida sang maraga sulinggih patut ngaturang punya. Asapunika talēr ring sang mapitulung patut mawéh dana.
4. Sang sapisira hugi krama Désa Teméga yan mapakayun pacang maétéh-étéh mawintēn, mapodgala, talēr mangda wéntēn pasadok mapyuning ring prajuru désa, sajaba patut polih palugrahan saking Guru Wiśéṣa.
5. Munggwing tata cara matēlah-tēlah, mawintēn minakadi mapodgala mungguh sajroning paswaran désa.
6. Prajuru Désa Teméga, mamatut pisan, yan krama désané mapunya ring sang prajñan, ring sang widagdha, ring sang satata ngarajēgang dharmma, pingajēng ring Ida sang maangga Sulinggih pasūryyan ñané sowang-sowang.

Palēt 3

Indik Pitra Yajña

Pawos 39

1. Pamarggi ngupakāra śawa, hugi manut linging śāstra Agama Hindu. Wéntēn akudang-kudang soroh, sakadi hinucap ring sor puniki:
ha. Mapēndhēm ring prathiwi.
na. Makingsan ring ghni.
ca. Atiwa-tiwa, utawi palēbon, utawi ngabén.

- ra. Yan raré durung makupak huntu, wus kēpus hodēl hantaka, wēnang nganggé pangēntas bangbang masadhana klungah klapa gadhing, ngaran Ngalungah, tan wēnang tiniwākēn.
- ka. Yan raré durung kēpus hodēl hantaka pamali ngaran, pēndhēm juga tan hana pangupakāranya kēwala gantēn utawi adēm paicchan Ida Sulinggih.
2. Sang sapisira hugi krama Désa Teméga, tan kawaśa makta śawa ka désa pakraman, yan śawa ika sampun kēni pangupakāra śawa. Yan wēntēn mamurug, yogya katiwakar, daṇḍha, mrayaścita marisuddha désa.
 3. Salwiring upacāra atiwa-tiwa, palēbon, ngabēn, ring sétra ugi kawēnanganya, tan wēnang ring désa pakraman. Yan wēntēn mamurug, wēnang daṇḍha marisuddha désa, krama désa sang atatulung daṇḍha artha manut pangarggan bēras 50 kilogram kang sadiri.
 4. Sang sapisira hugi tan wēnang nginēpang minakadi ngawangdéyang bangbang ring sétra Pakraman Teméga, yan wēntēn mamurug kadaṇḍha manut pangarggan bēras 100 kilogram, bangbang hinucap patut kahurug saha mawēwēh pañangaskāra.
 5. Sang sapisira hugi krama Désa Teméga tan wēnang atitiwa, ri kāla pangaci-acin désa, lwiré: Patīrthān, patotoyan, pangusabhan ring Pura Kahyangan Tiga, minakadi pura-pura kahyangan sané kahēmpon antuk désa, Bhaṭāra Turun Kabéh, Tabuh Gēntuh, minakadi karyya agung sawosan. Yan wēntēn mamurug, daṇḍha mrayaścitta désa, minakadi krama désa sané matulung daṇḍha gung artha manut pangarggan bēras adaśa kilogram kang sadiri.

6. Yan makingsan ring ghni, sawa ginēsēng, hasti hinañut, manut krama. Yogya nganggé tirtha paběrsihan. Munggwing déwaśa, sasor ipun déwaśané dados margginin mēñdhēm sawa, sajaba larangan désa tan dados ngēsēng sawa.
7. Yan wéntēn krama désa mēñdhēm sawa kālaning dina larangan kawaśa, nānghing hugi masawén, durung masusunin bintak, laku kingsan ngaran.
8. Indik padéwaśan :
 - ha. Padéwaśan mēñdhēm ring prathiwi, makingsan ring ghni, wēnang katiwakang antuk bēndésa utawi pamangku dalēm manut paswaran désa;
 - na. Padéwaśan atiwa-tiwa, katiwakang antuk Ida sang maangga Sulinggih sané pacang muput, yogya sāmpun kapatut antuk prajuru désa.
 - ca. Indik larangan ngupakāra sawa, sajaba ngunggahang ka tumpang salu, sané kamanggēhang sajroning Désa Pakraman Teméga, lwiré: Buda Wagé, Śaniścara Kliwon, Anggara Kliwon, sēmut sadulur, kāla gotongan, paśah, prawani, pūrṇama, tilēm, yan pacang makingsan ring prathiwi ritatkālaning dina larangan désa, patut kamarggyang sasāmpun surup Sang Hyang Suryya. Yan wéntēn sinalih tunggal mamurug, wēnang dañdha gung artha manut pangarggan bēras 50 kilogram saha mrayaścitta désa;
 - ra. Tan wēnang ngagah ngulung, tēgēs ipun, sajroning sétra tunggal, tan dados mrēsihin sawa, nuju dina pangutangan yan ring sétra punika wéntēn ngalakṣanayang pangabénan. Yan wéntēn mamurug dañdha gung artha manut pangarggan bēras 50 kilogram, saha mrayaścitta sétra;
 - ka. Tan wēnang ngutang ngirim, tēgēs ipun, sajroning sétra tunggal yan wéntēn ngirim, tan dados sané sawosan mēñdhēm sawa, minakadi

atiwā-tiwa, ngabén, ring dina punika. Yan wéntén mamurug, yogya
daṇḍha, gung artha manut pangarggan bēras 50 kilogram saha
mrayāścitta sētra:

- da. Yan wéntén mēndhēm śawa langkungan ring adiri sajroning sētra
Teméga hugi sinarēngan.
9. Yan śawa sangkaning salah pati, angulah pati, mati kapangawan,
minakadi salwir ipun, désa tan ngelarangin, yan śawa punika tiniwākēn
tan nganggé sasēngkēran.
10. Yan wéntén sinalih tunggal śawa, gēnahé sēda wyadin padēm, sajaba
ning karang pomahan, lwiré: ring tēgal, pura, pasar, bañjar, sēkolah,
minakadi gēnah sawosan dudu karang pomahan, yogya sang madruwé
wirangé mrayāścita marisuddha gēnah punika. Yan śawa tan
kaparihangkēnan, gēnah punika patut kaparisuddha kaprayāścita antuk
sang maduwé hēmponan utawi désa.
11. Indik tata cara pitra yajña kaungguhang sajroning paswara.

Pawos 40

Indik angatma wédhana:

1. Sang sapasira hugi krama Désa Teméga, yan kālaning angatma wédhana,
lwiré: ngaroras, patilēman, baligya, tan wēnang ngawangunang payajñan,
pétak, ring palēmahan pura Kahyangan Désa, minakadi kahyangan
sawosan.
2. Sang sapasira hugi wus ngawangun karyya angatma wédhana, yogya
karang payajñan ika kapraliṇa, sakasép ipun pētang daśa kalih dina

saking dina karyyané.

Palët 4

Indik Manuša Yajña

Pawos 41

1. Sang sapisira hugi krama Désa Teméga, ngawangunang salwiring upacāra mānuša yajña, tan wēnang magēnah ring wawidangan palēmahan kahyangan pañiwiyan désa. Yan wéntēn sinalih tunggal mamurug, wēnang daṇḍha gung artha manut pangarggan bēras 10 kilogram, saha *mrayāscita marisuddha pura punika*.
2. Sané kalugra mawintēn magēnah ring pura sinalih tunggal, sang sapisira hugi krama désa sané pacang kahadēgang dados pamangku, ring pura kahyangan inucap. Talēr kahadēgang pinaka prajuru désa, wēnang mawintēn, majaya-jaya ring Pura Pasar Agung.
3. Indik manuša yajña sané dados kamargyang sajroning Désa Pakraman Teméga hugi sané nganutin drēṣṭa kuna minakadi śāstra agama.

Palët 5

Indik Bhuta Yajña

Pawos 42

1. Sajroning Désa Pakraman Teméga, pacaruwan manut hunggwan, kālīh sor singgih, lwiré :
ha. Pacarun Désa sané kawangunang sadakāla;
na. Pacarwan désa padgatakāla, rikāla jagaté kabrēbēhan, kagēringan,

kadürmanggalan, katibén bhaya miwah sané sawosan sané patut caronin;

- ca. Agung alit caru, manut hunggwan acaru, babwatan pacarwan, kalih ništa, madhya, uttamaning caru.
2. Pacaruwan ring pura-pura kahyangan, dadya, salwiré, manut drěšťan pura sowang-sowang, minakadi awig-awig gagadhuhan pura hinucap.
 3. Yan wéntěn sinalih tunggal pura kahyangan, salwiré, rěňňng pacaruné kantos tigang plabuh, wěňang prajuru děsa mamawosin. Yan wus puput babawosé, yogya maguru piduka, ngawit masasapuh, mangda kasiddhan ngaturang pangaci-aci.
 4. Pacaron kălaning tilēm śasih kasanga, ring děsa, baňjar minakadi ring karang sowang-sowang manut śăstra drěšťă, kalanturang antuk brata paňěpyan.
 5. Rikălaning ngalakṣaṇayang brata paňěpian, krama ngamargyang ring jro sowang-sowang. Tan kalugra mědal ka rurungé lan margi agung kaaptiang mangda jati-jati trěpti tur sipeng. Yan katangVehan utawi mamurug doṣa gung arta 5 kilogram bėras.
 6. Pradé wéntěn kapaňcabhaya utawi kabwatan patut digělis matur supėkṣa ring prajuru děsa utawi langlang děsa.

SAT SARGGAH

SUKRĚTTA TATA PAWONGAN

Palět 1

Indik Rangkat

Pawos 43

1. Indik rangkat punika, mānut děsa kăla patra, mwanġ sima drěšťă sané

kapatutang tur katinutin antuk krama désa sowang-sowang, tan singsal ring ugër-ugër panāgara lwiré:

- ha. Papadikan;
- na. Marangkat utawi ngarorod;
- ca. Ngunggahin;
- ra. Narimén utawi katriménan.

2. Pidabdab sang marangkat patut:

- ha. Manut kēcaping āgama Hindu;
- na. Nganutin yuṣa sakirangnya risāmpun macihna munggha dēha truṇa, néntēn singsal ring ugër-ugër nāgara;
- ca. Pradé pacang ngarangkatang siyos āgama patut ngamargyang upacāra sudi wadhani sasāmpun wéntēn lēkita saking sang amawa rāt.

- 3. Sajroning Désa Pakraman Teméga, indik rangkat punika yan sampun mawidhi widhana pawiwāhan, rangkat punika sāmpun puput palikrama.
- 4. Yan wéntēn anak istri krama Désa Teméga karangkatang antuk sang sapasira hugi, luwih antuk anak saking dūra désa, yan kantos arahina ring awēngi saking dina matinggalé saking jumlah tan wéntēn pasadok, pajati, yogya sang maduwé wirangé nunas kanti ring prajuru Désa Teméga, mangda ngamargyang sasrēpan. Yan sampun sinah gēnahnya, ngararis ngamarggiang panēgdēg.
- 5. Mungghwing tata cara rangkat munggha sajroning paswaran désa.
- 6. Sang sapasira hugi krama Désa Teméga, yan karawuhan tamyu praya masinutan malarapan antuk ngarorod, hugi mangda masadok myuningang ring prajuru désa. Prajuru désa yogya maritētēs, yan sangkaning tan patut pamarggin rangkatnya, prajuru désa nguduhang mangda katur ring sang amawa rāt. Yan wéntēn krama désa mamurug, yogya sang mamurug

daṇḍha gung artha manut pangarggan bĕras 50 kilogram.

Pawos 44

1. Pradé wéntĕn anak lanang mobotin anak istri sané sami-sami durung madruwé rabi, tur sabda kapariangkĕn, prajuru patut ngutṣahayang sang kalih majangkĕpan, tur kaupacarayang sakadi patuté olih sang lanang. Pradé sinalih tunggal tan tinut karangkatang, kadaṇḍha gung artha manut pangarggan bĕras 100 kilogram, saha wicaranya katur ring sang amawa rāt.
2. Yan wéntĕn sinalih tunggal anak lanang sĕmpun madruwé rabi, mobotin anak istri sawosan, wicaranya katur ring sang amawa rāt.
3. Sang sapasira hugi kadapĕtan ngaruṣak, masanggama, sarĕng anak istri, kurĕnan anak, patut wicarané katur ring Guru Wiśĕṣa yan sĕmpun wéntĕn pamutus saking sang amawa rāt sang mawicara hinucap patut mrayaścitta raga gĕnah malakṣaṇa miwah désa pakraman.
4. Yan wéntĕn anak istri mobot nĕntĕn wéntĕn ngangĕnin patut:
 - ha. Sang kadalih mobotin tan mariangkĕn, miwah sang bobot madĕwa śakṣi ring pĕmpatan agung, kaśakṣinin antuk prajuru désa, sasĕmpun madĕwa śakṣi patut ngamargyang pamraścitta ring wawidangan Désa Pakraman Teméga, munggwing prabĕya sami kaangganin antuk sang nalih sasĕmpun punika bobotan anaké istri kaupacārayang maśraṇa antuk kĕris;
 - na. Pradé wéntĕn anak siosan ring sang kadalih maryangkĕn mobotin, wĕnang sang maryangkĕn punika sarĕng madĕwa śakṣi tur sasĕmpuné puput déwa śakṣiné sang mobot, sang kadalih miwah sang mariangkĕn sarĕng mobotin mrayaścitta désa, sasĕmpun punika bobotan anaké istri kaupacārayang maśraṇa antuk kĕris;
 - ca. Pradé sang patut madĕwa śakṣi tan satinut ngamargyang padĕwaśakṣyan, sang bobot utawi wirangnya patut ngaturang wicara punika ring sang amawa rāt.

5. Yan wéntën sinalih tunggal Krama Désa Teméga, ngamét anak istri antuk mlëgandang, mamëndët, marikoša, miwah salwir ipun sané tan nganutin tata krama, tan yogya pinuput pawidhi widhananya sadurung wéntën pamutus saking Guru Wisésa.
6. Yan wéntën sinalih tunggal saking dūra désa, pacang muput rangkat ka wawëngkon Désa Pakraman Teméga, sang madruwé wirang luh yogya nunas pasakši ring prajuru Désa Teméga masraṇa antuk canang pangrawos, sinalih tunggal mangda wéntën ngarawuhin.
7. Yan wéntën anak istri saking Désa Teméga marangkat ka dūra désa ritatkāla mapuputan ñongkol masërah ka umah wirangé istri patut ngaturang panëbas swaran kulkul ka Désa Pakraman Teméga gung artha manut pangarggan bëräs 25 kilogram.
8. Yan wéntën sinalih tunggal krama Désa Teméga, ngamét anak istri pinaka rabi tan manut sima drëṣṭa minakadi śāstra āgama, yogya katur ring sang amawa rāt mangda kabawosin saha polih pamutus.

Palët 2

Indik Bëlas Makurënan utawi Ñapyan

Pawos 45

1. Sané kabawos ñapiyan, sang palas marabi, palas makurënan, mawiwit wicara macihna tan tumus suka cittaning panunggalan idhëp sang alaki rabi sané sāmpun katiwakan pamutus antuk Guru Wisésa saha kadamyakang ring sangkëpan Désa Teméga, minakadi ring bañjar.
2. Tata cara palas marabi:

- ha. Yan wéntën krama désa mapikayun pacang palas marabyan patut matur supékša ring prajuru désa, prajuru patut maritētēs, tur ngicchén tatimbang mangda prasiddha malih hadung marabi;
- na. Sang sapasira hugi madruwé oka istri sâmpun marabyan pradé mantuk sangkaning ngambul, sajroning tigang śasīh utawi 105 dina patut matur supékša ring prajuru désa, olih prajuru désa wicaranya kabawosin, tur kicchén tatimbang mangda kasiddhan hadung malih;
- ca. Yan tatimbang prajuru désa tan katinutin, wicaranya dados kalanturang ring sang amawa rāt, pradé pamutus sang amawa rāt patēh kadi tatimbang prajuru désané, sang mawicara kadandha manut pangarggan bēras 100 kilogram.
3. Yan wéntën sinalih tunggal krama désa ngrangkatang sapyan sadurung tigang śasīh utawi 105 dina, saking dina palasé, yogya sang ngrangkatang sapyan punika kēni daṇḍha pakérang gung artha manut pangarggan bēras satus kilogram.
4. Krama désa sané bēlas marabi utawi makurēṇan, sasâmpun polih pamutus saking Guru Wiśēša patut masadok myuningang ring kliyang bañjar, mangda kadamyakang ring bañjar ring désa, sakasép ipun aśasīh saking palasé.
5. Yan wéntën anak istri wit saking wawēṅkon Désa Pakraman Teméga, ṇāpyan ring dūra désa, mawali ka désanya, yogya sang madruwé wirang matur supékša ring prajuru désa, saha mrayaścitta marisuddha anaké luh punika. Yan tan kaparisuddha antuk wirangnya, patut marisudha raga, mangda tan kasinangguh cuṇṇaka.

Palët 3

Indik Balu

Pawos 46

1. Sané bakawos balu, anak istri katinggal séda antuk rabiné, yan anak lanang séda rabiné, wyadin katinggalin ñapyan, talër kawastanin balu.
2. Yan wéntèn lanang balu, ngawèngku karang paumahan, maduwé santana utawi oka istri sampun hantès māyahan, yogya māyahan bulangkép.
3. Yan wéntèn anak istri balu ngawèngku karang paumahan, maduwé santana utawi oka lanang sampun hantès māyahan, yogya māyahan bulangkép.
4. Yan wéntèn sinalih tunggal anak istri balu, marangkat, yogya rangkat punika kapuputang antuk wirang lakiné rihin, yan babalon punika kari pagèh.
5. Mungging wawénangan babalon luh utawi rangda, ring indik wawarisan, minakadi sané sawos-sawosan, lwiré:

ha. Myara lan muponin wawarisan sakantun pagèh magènah ring rabiné;

na. Tan dados ngadol, ngadéyang utawi makidihang wawarisan ring sang sapisira hugi, sajabaning polih palugrahan saking waris ka purusa;

ca. Pradé balu sané pagèh nganutin swadharmanya, raris katundung olih waris rabiné, balu hinucap patut matur supékša ring prajuru, prajuru patut mamawosin, ngicchéh tatimbang, yan tatimbang prajuru tan katinutin, sinalih tunggal dados ngalanturang wicaranya

ring sang amawa rāt pradé pamutus sang amawa rāt patēh ring
tatimbang prajuru désané, sang kawon mawicara kēni dandha manut
pangarggan bēras 50 kilogram.

Palēt 4

Indik Santana

Pawos 47

1. Sajroning Désa Pakraman Teméga, ngarajégang pidabdab santana ka
puruṣa minakadi santana papėrasan.
2. Padé pawiwāhan tan ngawéntėnang santana, kėngin ngėdih santana antuk
upasakṣi sakala niṣkāla sané kawaṣṭanin santana papėrasan.
3. Sang sapisira hugi krama désa mėras santana, kasinanggėh sampun puput
palikrama, yogya sangkaning radin, mawidhi widhana papėrasan,
kaśakṣinin antuk prajuru désa saha kasyarang ring paruman, tur sām̄pun
wéntėn lėkita pamikukuh saking sang amawa rāt.
4. Sané dados kapėras kaanggén santana kadi ring sor puniki:
ha. Anak sané maagama Hindu;
na. Papėrnahan nėdunang saking waris kapuruṣa, tunggal dadia, tunggal
siddhikāra, yėning tan wéntėn saking kapuruṣa tunggal dadia,
tunggal siddhikāra, dados saking pradhana, yan talėr tan wéntėn
saking pradhana dados ring sang sapisira hugi, sané kacumponin
antuk krama dadyanya.
5. Indik mėras santana, sasām̄pun puput upacāranya manut śāstra āgama
Hindu, kalanturang ngarėrėh lėkita ring Guru Wiśėṣa.
6. Murggwing tata cara mėras santana mungguh sajroning paswaran désa.

Palét 5

Indik Wawarisan

Pawos 48

1. Lwiré sané wénang kawaris :
 - ha. Hamong-amongan ring désa, ayah-ayahan sahurah-arih.
 - na. Hutang-pyutang sang kawarisin.
 - ca. Sarāja druwé, braṇa, tatamiyan, sakañcan kasugihan.
2. Sané wénang ngawarisin :
 - ha. Manūt lalintih paprēṇahan adoh tampĕk saking puruṣa tunggal siddhikara, tunggal dadya.
 - na. Putra dadaman wyadin putra papĕrasan.
 - ca. Katriménan waris saking sang makĕdihang raga, sané patut katriménang.
 - ka. Sangkaning polih pitēmĕs saking sang kawarisin, sang madruwé salwir sané dados kawarisang, saking palugrahan Guru Wisésa, pinih akéh apahtigayan saking padruwéyan ñané maka pyolih-olih pagunakayan.
3. Sang sapasira hugi Krama Désa Teméga, tilar saking Agama Hindu, tan yogya ngawaris sané kamulan patut kawarisin.
4. Ngĕdum wawarisan, kapatut sasāmpun puput maabénang sang ngawarisang braṇa kalih kasugihan punika. Sané dados dum, sajaba sané patut manggé padagingan pangaci-aci, minakadi salwiring sané manggé piranti ngalakṣanayang upacara agama, pustaka-pustaka sané kapingitang salwiripun.

- pah-pahan wawarisan kadi ring sor;
ha. Sané lanang polih atëgën;
na. Sané istri polih asuwun. hamung muponin kéwantën.
Pawaris kéngin mapawéwéh rikāla kantun mahurip ring oka sané pacang
késah marabyan, marupa pitëmës sané dados kawarisang pinih akéh
apahtigayan saking padruwéyannyané maka pyolih-olih pagunakaya.

SAPTAMA SARGGAH

WICARA LAN PAMIDANDHA

Palët 1

Indik Wicara

Pawos 49

1. Salwiring wicāra indik pakraman, ring wawidangan Désa Pakraman
Teinéga, wë nang rinawosan antuk prajuru désa. yan tan kasiddhan puput,
prajuru désa ngaturang ring kërtha désa mangda maṣṭika pamutus, yan
pamutus kërtha désa tan katinutin antuk sang mawicara, wicaranya katur
ring sang amawa rāt.
2. Yan wëntën wicara ring pamakṣan, ring bañjar, subak, minakadi sèkëha-
sèkëha sawosan, yogya kabawosan antuk prajurunya sowang, yan tan
kasiddhan puput, wë nang katëngahang ka désa, prajuru désa yogya
mamawosin.
3. Indik nēpasin wicara hinucap, tan marën ngupadi dharmma kawēlas
asihān, tur malarapan antuk, lēkita, bukti, śakṣi, saha tan marën mangda
nēpék ring sadaging awig-awig, paswara kalih pamutus pararēm désa.

4. Yan sang mawicāra tan tinut ring pamutus wicara sané katiwakang hinucap ring hajēng, prasiddha sang mawicara tan kalugra nganggé sapadruwéyan Désa Teméga doṣané mamandal ring désa.

Palēt 2

Indik Pamidaṇḍha

Pawos 50

1. Lwir pamidaṇḍha sané wēnang katiwakang antuk prajuru désa, bañjar pakraman, subak, sēkēha-sēkēha sawawēngkon Désa Pakraman Teméga, sakadi ring sor puniki :
- ha. Daṇḍha artha;
- na. Upasakṣi, déwa sakṣi, pangrarata, sumpah;
- ca. Daṇḍha panyangaskara, lwiré; mrayāscita, marisuddha, miwah salwir ipun;
- ra. Kasēpékang saha kahēladang;
- ka. Pamidaṇḍha sawosan manūt palugrahan Guru Wiséṣa.
2. Patiwak pamidaṇḍha, manut hunggwan wicarané sowang-sowang, minakadi wērat ringan wicara hinucap. Lwiré :
- ha. Yan wicara ring désa pakraman, yogya kapidaṇḍha antuk désa. Munggwing dadaṇḍhan mantuk ka désa;
- na. Yan wicara ring bañjar pakraman, yogya kapidaṇḍha ring bañjar ika, dadaṇḍhan mantuk ka bañjar;
- ca. Yan ring subak, ring sēkēha-sēkēha, katiwakin pamidaṇḍha ring kuwu témpéknya sowang, munggwing dadaṇḍhan mantuk ka

jroning kuwu témpékannya.

3. Agung alit dadaṇdhan, manut panglokikan agung alit kasisipané sané mungguh ring awig-awig gagaduhan sowang-sowang, minakadi paswara pinaka pamutus paruman.

Pawos 51

1. Rikāla pawanṅgan nawur paturunan, dadaṇdhan mwan hutang ring désa, yaning cėléd wṅang nawur nikėl apahtṅga.
2. Risāmpuné kṅni daṇdha nikėl apahtṅga, mawanṅg malih tigang rahina patut sāmpun katawur, yan tan prasiddha katawur patut nikėl tur katawur malih asangkṅpan.
3. Risāmpuné kṅni daṇdha nikėl mawanṅg malih asangkṅpan talṅr tan katawur wṅang sang kṅni daṇdha ṅuḱsrahang kantah sané sawawa pangarggan ipun ring agṅg dadaṇdhané.
4. Yan kantos langkung ring pitung rahina saking ṅuḱsrahang barang kantah punika nṅntṅn katṅbas wṅang kalṅlang saduhajṅg antuk krama désané. Yan panumbas punika lintangan ring dadaṇdhané, lintang ipun katrimayang ring sang madruwé, yan panumbas barang punika kirang ring dadaṇdhané, sang kṅni daṇdha patut malih ngawuwuhin mangda tṅgṅp.
5. Pradé sang kṅni daṇdha tan suka, tan mrasiddhayang ṅuḱsrahang barang pinaka kantah, prasiddha kabawos tan nganutin awig-awig désa, hawanan kasṅpṅkang saking désa.

ASTAMA SARGGAH
NGUWAH-NGUWUHIN AWIG-AWIG

Pawos 52

1. Sané wēnang uwahin, inggih punika, pasukrētan, pamutus pararēm wyadin pamutus pasamuhan miwah sané sawosan sapanunggilan ipun.
2. Sané wēnang uwuhin inggih punika, pasukrētan, paswara, pamutus pararēm wyadin pamutus pasamuhan miwah sané sawosan sapanunggilan ipun.
3. Indik nguwahin kalih nguwuhin pasukrētan, paswara, pamutus pararēm wyadin pamutus pasamuhan miwah sané sawosan, manut tata kramaning pasamuhan.
4. Indik nguwahin kalih nguwuhin awig-awig, manut tata kramaning pasamuhan sasāmpun nunas tatimbang ring Guru Wiśēsa kalih polih palugrahan sang amawa bhumi.

NAWAMA SARGGAH

PAMUPUT

Pawos 53

1. Awig-awig puniki mawaṣṭa Awig-awig Désa Pakraman Teméga.
2. Awig-awig puniki pinaka bantang sahananing awig-awig, paswara, pasukrētan, miwah salwir ipun, sané manggé ring bañjar pakraman, subak, sēkēha-sēkēha, sané wēntēn sajroning Désa Pakraman Teméga.
3. Bañjar, kahyangan, pamakṣan, subak, sēkēha-sēkēha sané wēntēn sajroning Désa Pakraman Teméga wēnang ngawangunang awig-awig

- pasukërtha, paswara, gagadhuhan sowang-sowang, nānging daging ipun tan dados singsal tungkas ring Awig-awig Désa Pakraman Teméga.
4. Salwiring sané durung mungguh ring awig-awig puniki, kaungguhang sajroning paswara, pamutus paruman Désa Pakraman Teméga.
 5. Drěṣṭa kuna sané kari dados anggé, yan tan tungkas ring daging Awig-awig Désa Pakraman Teméga manut kojaring śāstra Agama Hindu, hanūt ring ugěr-ugěr nāgara, saha kaputusang sajroning paruman Désa Pakraman Teméga.
 6. Awig-awig Désa Pakraman Teméga, pawangun Krama Désa Teméga, kapaṣṭika manūt Upacāra Agama Hindu, kāla dina; Rědité, Pahing, Wara Matal, śasih, Kaṣa, tanggal ping 14, rah, 8, tēnggěk, 2, Isaka, 1928, magēnah ring Pura Désa Teméga, kapuput antuk Ida Padaṇḍha saking Gria
 7. Awig-awig puniki kalinggatanganin antuk prajuru désa, lwiré: Běndésa, Panyarikan, Juru Rākṣa, pangliman kapěrthama, pangliman kaping kalih, pangliman kaping tiga, saya gėdé, kělyang-kělyang bañjar pakraman, kasaksinin antuk kělyang bañjar dinas, Pěrběkěl Teméga, Camat Manggis, kakukuhang antuk Bupati Karangasēm.
 8. Awig-awig puniki kalakṣaṇayang ngawit dina pamlaspasé, tan pawaněng kantos salantur ipun.
 9. Luwir sang ngalinggatanganin :
ha. Prajuru Désa Teméga :